

6

DE  
CAVSSA SERVITVTVM  
PERPETVA

EXERCITATIO IVRIDICA INAVGVRALIS,  
PRAESIDE

IO. GOTTL. HEINECCIO IC.

POTENT. PRVSS. REG. A CONSILIIIS SANCTIORIBVS  
ET IVR. AC PHILOS. P. P. ORD.

ET IVRECONSULTORVM ORDINIS H. T. DECANO,  
PRO CAPESSENDIS SVMMIS IN IVRE HONORIBVS

A. D. XX. IVN. MDCCXXXVIII.

H. L. Q. C.

PVBLICAE DISQVITIONI PROPOSITA

A  
IAC. HENR. KVRELLA

NEIDENBURGENSE PRVSSO.

---

HALAE MAGDEBVRGICAE

TYPIS IO. CHRIST. GRVNERTI, ACAD. TYPOGR. (7 $\frac{1}{2}$ )



THE UNIVERSITY OF CHICAGO

LIBRARY

1000 UNIVERSITY AVENUE

CHICAGO, ILL.

1900

1901

1902

PARENTI OPTIMO  
**IACOBO KVRELLA,**  
ET  
AMICO AESTVMATISSIMO  
**IO. CHRISTIANO GOTTL.**  
**HEINECCIO,**  
HOC  
LEVE DISSERTATIONIS INAVGVRALIS  
ΣΧΕΔΙΑΣΜΑ,  
PIA  
ET  
INGENVA MANV  
OFFERT

IACOBVS HENRICVS KVRELLA.





Q. D. B. V.

DE

# CAVSSA SERVITVTVM PERPETVA

EXERCITATIO IVRIDICA INAVGVRALIS.

---

- §. I. **D**Octrinae de servitutibus subtilitas. §. II. Eius subtilitatis causa. §. III. Conceptus servitutis secundum principia rectae rationis. §. IIII. Variarum huius conceptus determinationes ex iure civili. §. V. Instituti ratio et partitio dissertationis. §. VI. Locus primus de causa servitutum perpetua, l. 28. D. de serv. urb. praed. §. VII. Brevis eius analysi. §. VIII. Locus alter, l. 23. §. 1. D. de servit. praed. rust. eiusque explicatio. §. VIII. Locus tertius, l. 4. D. de fonte. §. X. Locus quartus: l. 29. D. de servit. urb. praed. §. XI. Observationes quaedam ex his iureconsultorum testimoniis. §. XII. De causa servitutum perpetua sententia 10. SUPERIORIS. §. XIII. Eius examen. §. XIII. Sententia DVARENI, CUIACII aliorumque excussa. §. XV. Nec non DONELLI et NOODTHII interpretatio. §. XVI. Eius examen.
- A

men. §. XVII. *Interpretatio* M. AVRELIJ GALVANI *expensa*. §. XVIII. *Hypothesis* cel. VLR. HVBERI. §. XVIII. *Quaedam circa illam dubia*. §. XX. SCHILTERI *sententia*. §. XXI. *Eiusdem examen*. §. XXII. *Iudicium* cel. THOMASH. §. XXIII. *Quaedam de illo monita*. §. XXIII. *Perpetuitas causae semper fuit inter adfectiones servitutum praedialium*. §. XXV. *Eius principii ratio*. §. XXVI. *Quid sit CAUSSA PERPETVA?* §. XXVII. *De quibusnam servitutibus disceptatum fuerit, an causam perpetuam habeant?* §. XXVIII. *Regulae de causa servitutum perpetua*. §. XXVIII. *Regularum istarum applicatio ad l. 28. D. de serv. vrb. praed.* §. XXX. *Nec non ad servitutem fumi immittendi, et aquae haustus e cisterna*. §. XXXI. *Denique ad servitutem aquae, rota e sumine tollendae, vel e castello ducendae*. §. XXXII. *Conclusio dissertationis*.

## §. I.

Doctrinae de  
servitutibus  
subtilitas.

Q Vum in vniuersa Romanorum iurisperitendia doctrinae permultae satis difficiles, et a communi hominum sensu remotae, passim occurrunt: tum illa omnium fere spinosissima de SERVITVTIBVS, quae vel personis, vel praediis debentur, quippe ex IO. CORASII a) sententia, a nemine omnium, qui adhuc eam sunt interpretati, funditus eruta enucleataque. Et sane, quum iureconsultus in iure non minus interpretando, quam exco- gitandis calumniis, ingeniosissimus, BARTH. CAEPOLLA initio statim libri de servitutibus, nihil se vumquam, quod iam aliorum industriam occuparit, scribere voluisse profiteatur, statim addit, hanc ipsam se sibi materiam ideo potissimum seposuisse, quippe et subtilem admodum, et a nemine ante se, quod

a) Coras. *Epist. dedicat. ad Cardin. Orbonem a Castillione, Comment. tit. D. de servit. praemissa* p. 4.

quod meminerit, satis perpolitam. Qua in re quamuis forte et memoria, et collocata in studiis suis fiducia hominem fefellerit: in eo tamen, quod hanc de seruitutibus doctrinam subtilissimam esse existimauit, rem omnino acu tetigit, consentientesque sibi habet viros doctos quam plurimos, e quorum numero GER. GOTTL. TITIVS, b) vir recti ac limati iudicii: *Vti, inquit, seruitutes, ex communibus utilitatis humanae regulis oriundas, Romani in sua quoque republica agnoverunt, earumque iura egregie in multis excoluerunt, vt grato animo illa agnoscere par sit: ita fatendum nihilominus est, quod subtilitatibus minime quidem necessariis, sed a veritate et communi usu plerumque abeuntibus, materiam hanc quandoque inuoluerint.* Enimvero, si recte ponas calculum, non tam veterum iuris auctorum hoc vitium est, quam interpretum, qui vere intelligendo fecerunt, vt intelligamus nihil, salebrasque et asperitates, quae hic multae et magnae sunt, verbosissimis commentariis suis, adeo non explanarunt, vt qui ad eos, tamquam in portum, confugiunt, pro Charybdi in Scyllam incidisse sibi videantur, et quum antea eam doctrinam subtilem ac difficilem habuerint, consultis his oraculis, multo se, quam dudum, fateantur esse incertiores.

## §. II.

Cur vero materiae iuris, in foro frequentissimae, ac Eius subtili-  
paene quotidianae, tam spissae tenebrae paullatim offusae sint, tatis causa.  
intellectu non admodum difficile videtur. Ita enim natura comparatum est, vt, quo ius civile ad naturalem aequitatem, et ius illud sempiternum, quod ipsa recta ratio inter omnes homines constituit, accedit propius, eo illud sit planius ac simplicius: tanto obscurius autem ac subtilius, quanto magis a rectissimo illo tramite secedit, ac veluti in deuia defleuit. Sane, quod de ipsa natura Thaletem Milesium sapienter dixisse

A 2

refert

b) Ger. Gottl. Titius *dissert. de seruitute faciend. §. VIII.*

refert PLVTARCHVS c) *ῥᾶνόν ἐναὶ τὸ κατὰ φύσιν*, *facillimum esse, quod sit naturae consentaneum*, quodque de eadem adfirmat SENECA, d) *nihil homini naturam, necessarium quod feceris, fecisse operosum*: idem de iure illo naturali recte dici posse arbitramur, nullis quippe spinis obsito, nullis confragoso subtilitatibus, sed plano vbique, facillimo ac simplicissimo. Quemadmodum igitur, quo magis linea quaedam flexu suo a recta decurrit, eo magis illam curuam fieri oportet: ita fieri non potest, quin ius civile tanto sit subtilius, quanto est a naturali iuris vniuersalis rectitudine ac simplicitate remotius. *Illam enim aptitudo, quae a natura data vel instituta, crenit aut disciplinis, aut contemplatione, SVBTILITAS, meo quidem iudicio, haberi debet*, inquit IVL. CAES. SCALIGER. e) Quum ergo et ius illud sempiternum, a natura datum institutumque, per disciplinam et contemplationem iureconsultorum creuerit, et ipse VLPIANVS f) iam obseruarit, *ius civile neque totum a naturali et gentium iure recedere, nec ei per omnia seruire, sed, quum aliquid addatur vel detrahatur iuri communi, ius proprium vel civile effici*: adeo non mirum est, plerasque iuris mere ciuilibus doctrinas esse difficiles, aliasque aliis subtiliores, vt, si aliter se res haberet, id profecto vel maxime mirandum esse videretur.

## §. III.

Conceptus  
seruitutis se-  
cundum  
principia re-  
ctae rationis.

Iam, vt ad SERVITUTES redeamus, pleraque, quae de illis ius civile Romanum inculcat, a iuris naturalis simplicitate quam maxime recedere, nemo, qui ea iura inter se paulo accuratius contenderit, inficiabitur. Si rem ex rectae rationis principiis aestimes, seruitutes inter ea iura sunt, *quae necessitatem constituisse*, ait MODESTINVS. g) Si enim naturae suae

c) Plutarch. in *Sept. Sapient. conuiu. p. 153.*

d) Seneca *Consolat. ad Heluiam Cap. XI.*

e) Iul. Caes. Scaliger *de subtilitate Lib. I. Cap. I. p. 4.*

f) l. 6. pr. D. de iustit. et iure.

g) l. 40. D. de legib.



suae memores essent omnes homines, et incredibili virtutis pulcritudine peraeque caperentur: nulla omnino seruitute opus foret. Vti enim amicorum, ita omnium hominum, veram virtutem colentium, omnia communia futura, nec quisquam alteri, quod ad eius vtilitatem commoditatemque pertinet, esset denegaturus. Quineodem quisque foret animo, quo fuit SENECA, h) dum scripsit: *Consortium rerum omnium inter nos est: nec secundi quidquam singulis, nec aduersi. In commune viuitur. Non potest quisquam beate degere, qui se tantum intuetur, qui omnia ad vtilitates suas conuertit. Alteri viuas oportet, si vis tibi viuere. Haec societas diligenter et sancte obseruanda est, quae nos omnes omnibus miscet, et iudicat, aliquid esse commune generis humani.* Non ergo quisquam fretus, iure dominii, quod in aliorum exclusione a rerum nostrarum vfu consistit, alteri vllum humanitatis officium, maxime quod sine suo damno praestare posset, in suo denegaret, nec ideo statim seruire fundum suum crederet, per quem vicinus ire, ambulare, vel in quo aquam haurire cupiat: immo potius haec et similia vltro quisque, nullaque necessitate adactus, libenter praestaret. Enimuero ex quo refrixit inter homines amor, quem homini erga hominem ipsa natura impressit, virtusque laudari et algere coepit: non licuit profecto amplius homini in hominum humanitatis collocare fiduciam, ac proinde, interuenientibus patris, id sibi stipulari coacti sunt, quod sibi ab aliis et in rebus alienis praestari vellent. Hinc et varia iura sibi constituenda curarunt in fundis alienis, id est facultatem aliquid in iis agendi, vel quamdam ex iis vtilitatem capiendi, quam sibi gratis et sponte praestitutum esse vicinum, sperare vix licebat. Haec vero iura SERVITVTES vocari coeperunt, per quas adeo nihil aliud intelligimus, quam *iura in*

A 3

*fundo*h) Seneca *epist. XXXXVIII.*

*fundo alieno constituta, ob quae dominus eius, ad utilitatem aliquam commoditatemue, in illo alteri concedendam, perfecte obligatur.* Quum vero ea utilitas commoditasue vel certae tantum *personae*, vel ipsi *praedio*, omnibusque eius possessoribus promissa sit: priore casu SERVITVS PERSONALIS; posteriore REALIS nascitur. Quamvis enim et posteriore casu, ceu recte iureconsulti nostri viderunt, i) utilitas non tam ad praedia, quam ad eorum possessores, seu homines, *quorum causa omnia iura introducta sunt*, k) redundet: ita tamen obtinuit, vt, quia haec iura ipsa praedia meliora reddunt, et commoda ex iis capienda ad omnes possessores transeunt, praedium praedio seruire, ipsaeque servitutes huius generis REALES vel PRAEDIALES dicantur.

## §. III.

Variae huius  
conceptus  
determina-  
tiones ex iu-  
re civili.

Tam amplus, si a iure civili Romano discesseris, SERVITVTVM conceptus est, nec vllas alias determinationes recta ratio agnoscit. Sufficit in servitutibus praedialibus, possessori praedii cuiusdam ius esse, utilitatem commoditatemue qualemcumque ex vicino praedio capiendi. Qualem vero illam utilitatem commoditatemue esse oporteat, et quomodo illa percipienda sit, non magis definit recta ratio, quam quousque illa porrigi debeat. Omnia enim ista ad paciscendum arbitrium conuentionumque leges redire, facile vnusquisque intelligit. Ast vide, quantum ab hac simplicitate iuris naturalis ius civile recedat, et quam multis, subtilibus admodum, parumque necessariis determinationibus illud conceptum hunc circumscribat, ne omnis utilitas, quae nobis e re aliena provenit, servitutis nomine veniat. Sic sane quum utilitas commoditasue illa ex vicini vel *facto*, vel *non facto*, vel *patientia* denique, capi possit: iureconsulti seruitutem

i) l. 15. de servitut. Guil. Maran. paratist. Digest. tit. de seruit. p. 253.

k) l. 2. D. de statu hom.

uitutem negant in faciendo consistere posse. l) Qua semel admissa hypothesi, non potuerunt non nasci quaestiones subtilissimae, anagi possit ad reficiendam fossam, cuius non exstet memoria? m) an is cuius paries onus vicini ferre tenetur, ad reficiendum parietem obstrictus sit? immo an pactum huiusmodi, constitutioni seruitutis istius recte adiciatur? n) Cuiusmodi quaestiunculis facile carent Germani, quibus iam olim nihil obstare visum est, quò minus & faciendi seruitus constitueretur, vti ex instituto docuerunt GER. GOTTL. TITIVS, o) EPHR. GERHARDVS, p) et nuper illustres PRAESES, Vir de omni felicitate mea, ob maxima, quae in me contulit beneficia, immortaliter meritus, in iuris Germanici elementis. q) Eiusdem generis sunt subtilitates, quae ex aliis eiusdem generis determinationibus oriuntur, quam plurimae. Vnde ad raum vsque disputari videas, an seruitus in diem, vel ex die, vel sub conditione, vel ad certam conditionem possit constitui? r) an proprietario, consentiente usufructuario, fundo seruitutem imponere liceat? s) totumne fundum, an eius partem, adficiat seruitus? t) an seruitute quis recte vtatur vltra necessitatem praedii sui? u) an fas sit, solius voluptatis causa seruitutem sibi stipulari? x) De quibus omnibus tanta sunt sententiarum diuortia, tantae doctissimorum virorum congerationes, (quas nescio an operosius quisquam OSWALDO HIL-

LIGERO

l) l. 15. §. 1. D. de seruit.

m) l. 2. §. 7 D. de aqu. et aqu. plu. arc.

n) l. 33. D. de seru. urban. praed. l. 6. §. 2. D. si seru. vind.

o) *Dissert. de seruit. faciendi, quae inter iunctim editas est num. XI.*p) *Dissert. de seruit. in faciendo consistent. Ien. MDCCX.*q) *Elem. iur. Germ. Lib. II. §. CXXXI. sequ.*

r) l. 4. pr. D. de seru.

s) l. 15. §. 7. D. de usufr.

t) l. 9. D. de seruit. l. 13. §. 1. l. 23. §. 3. l. 26. D. de seru. rust. praed.

u) l. 5. §. 1. D. de seru. rust. praed.

x) l. 8. pr. D. de seruit.

LIGERO y) collegerit,) vt qui hic interpretes in concordiam reducere conetur, is eadem opera inter aquam et ignem pacem conciliet,

*Atque idem iungat vulpes, et mulgeat hircos.*

§. V.

Instituti ratio, et partitio dissertationis.

At mihi quidem iam non integrum est, tantos componere fluctus: neque tantum fortassis mihi superesset ingenii, vt per tot quaestionum syrtes, tanquam per medium profundum, ire audeam. At quia tamen, inter tot determinationes et restrictiones nulla est, ex mea quidem sententia, subtilior, nulla, quae plures difficultates pepererit, quam adfectio illa, seruitutibus tribui solita, puta, quod causa earum debeat esse perpetua: facturum me existimaui operae pretium, si de PERPETVA illa SERVITVTVM CAVSSA quaedam in chartam conicerem, in eaque potissimum vexatissima quaestione, dum specimen inaugurale more maiorum edendum est, ingenium industriamque exercerem. Quin id feci tanto libentius, quanto minus mihi vllus veterum recentiorumue adhuc innotuit, qui isthoc thema ex instituto tractandi coeperit consilium, multo minus qui illud ita enodarit ac perpoliuerit, vt ocium fecisse aliis, nullumque post messem spicilegium reliquisse videatur. Vt vero dissertationi ipsi suus confet ordo: commodissimum visum est, eam ita partiri, vt, recensitis, quae huc pertinent, veterum fragmentis, virorum doctorum Interpretationes ac sententias modeste expendam, iisque meam subiungam, eamque non solum solidis argumentis pro virili suffulciam, verum etiam ab obiectionibus, si quae illi obuerti possint, vindicare studeam. Id quod vt bene vertat DEVS O. M. ex animo precor.

§. VI.

Locus primus de causa seruitutis perperua, l. 28. D. de S. V. P.

Vt ergo veterum iureconsultorum fragmenta, quae ad hoc seruitutum attributum pertinent, ordine recensentur: familiam merito hic ducit. PAVLLVS, *vir prudentissimus*,

y) Hillig. *Donell. enucl. lib. XI. et XII.*

mus, 2) et, iudice LAMPRIDIO a) *iurisperitissimus*, quin *legum prudentum coryphaeis* ab HERENNIO MODESTINO b) adnumeratus: sed idem, si alios audimus, saepe tam subtilis atque obscurus, vt de eo scribere non dubitet IO. BERTRANDVS: c) *Eius vniuersae leges ita obscurae, ambiguae, verborumque tenebris involutae sunt, vt id, quod de Chrysippo Cicero scripsit, de PAVLLO dicere verissime possumus, eum totum hoc volumen impleuisse oraculis flexilouis et obscuris, vt interpretes egeat interprete, et fors ipsa referenda sit ad sortes.* Quod iudicium sicuti aliquando verissimum est, ita GUIL. GROTIJ, d) IO. DVARENI, e) aliorumque doctissimorum virorum, suffragia meruit. Scripserat hic inter alia ad MASSVRII SABINI *ius civile* libros sedecim, quorum penultimo illum interdicta, ad seruitutes pertinentia, illustrasse, recte obseruauit IAC. GOTHOFREDVS, f) idque ex ipsis sedecim fragmentis, quae LABITTVS *ex libro illo ad Sabinum quinto decimo* enotauit, satis constat. Itaque et de seruitutibus stillicidij et fluminis eo loco egit, g) eaque occasione haec iura praediorum quasi possessione etiam adquiri posse docuit. Quum vero ferretur casus, quod quidam foramen in imo pariete, proluendi pavimenti causa, apertum habuisset, idque ius, tamquam seruitutem fluminis quasi longi temporis possessione quaesitum sibi adseruisset: disquirat, an proluuius illa per foramen fluminis nomine venire possit? itemque an praedij dominantis possessor ius illud tempore sibi adquisuisse videatur? Has ergo quaestiones ita breuiter soluit PAVL-

B

LVI:

- 2) l. 6. C. de nupt. l. 11. C. ad Leg. Corn. de fals.
- a) Lamprid. vit. Alexandri Sen. Cap. XXXII.
- b) l. 13. §. 2. D. de excusat.
- c) Bertrand. de iurisperis. Lib. I. Cap. XXV.
- d) Guil. Grot. vit. inuconsult. Lib. II. Cap. X.
- e) Duaren. ad l. 132. D. de verb. signif. p. 783. Op.
- f) Iac. Gothofred. in seriz librorum Sabinian.
- g) l. 20. D. de seruit. urb. praed.

LVS: h) *Foramen in imo pariete conclavis vel triclinii, quod esset proluendi pavimenti causa, id neque FLVMEN esse, neque TEMPORE ADQVIRI placuit. Hoc ita verum est, si in eum locum nihil ex caelo aquae veniat. Neque enim PERPETVAM CAVSAM habet, quod manu sit: at, quod ex caelo cadit, etsi non adfidue sit, ex NATVRALI tamen causa fit, et ideo PERPETVO fieri existimatur. Omnes autem servitutes praediorum PERPETVAS CAUSSAS habere debent: et ideo neque ex lacu, neque ex stagno, concedi aquaeductus potest. Stillicidii quoque immittendi naturalis et PERPETVA CAUSSA esse debet. Est hic locus, qui huc pertinet, primus, ac veluti praecipuus, quin totius istius doctrinae de causa servitutum perpetua veluti fundus, ac proinde eum, breui instituta analysi illustrare non ab fuerit.*

## §. VII.

Brevis eius  
analysis.

Primum itaque PAVLLVS speciem ponit, quod FORAMEN illud IN IMO PARIETE CONCLAVIS VEL TRICLINII PROLUENDI PAVIMENTI CAUSSA patuerit: ita enim recte legitur Florentiae, et nihili est, quod in quibusdam codicibus esse, notat IVL. PACVVS, *in vno pariete*. Hac quidem posita specie, respondet iureconsultus, NEQVE FLVMEN hoc ESSE, NEQVE id IUS TEMPORE ADQVIRI, PLACVISSE. Non *flumen*, quia tametsi per id etiam aqua educi soleat, ac proinde proluuiis illa, per foramen erumpens, hoc fluminis nomen non incommode ferre videatur, id tamen vocabulum ad aquam duntaxat pluuiam pertineat, ac proinde *caelum, quod supra id solum intercedit, liberum esse debeat*: i) conclavia autem et triclinia ita tecta sint laquearibus, *ut in eum locum nihil ex caelo aquae veniat*. Nec tempore id ius *adquiri*; quia servitutes quidem, quae continuam vel quasi continuam causam habeant, longi temporis praescriptione adquirantur, k) forami-

h) l. 28. D. de servit. urb. praed.

i) l. 1. D. de servit. urb. praed.

k) Dionys. Gothofred. ad l. 28. D. eod.

foraminis autem istius vsus ne nomen quidem seruitutis mereatur. OMNES ENIM SERVITVTES PRAEDIORVM CAVSSAM PERPETVAM HABERE DEBERE, nec sine ea adfectione seruitutem intelligi. NON AVTEM PERPETVAM CAVSSAM HABERE, QVOD MANV FIAT: AT QVOD EX CAELO CADAT, ETSI NON ADSIDVE FIAT, EX NATVRALI TAMEN CAVSSA FIERI EXISTIMARI. Vbi simul definitiones causae perpetuae, et non perpetuae occurrunt, eaeque ex media philosophia vetere, ceu ex ARISTOTELE l) et SENECA m) patet, deprompta. Hinc porro colligit, IDEO NEQVE EX LACV, NEQVE EX STAGNO CONCEDI AQVAEDVCTVM POSSE. Nam LACVS, teste VARRONE n) est *lacuna magna, vbi aqua contineri potest*, eaque plerumque manu excauatur, vt ibi aqua palustris et pluuiæ colligatur, contineaturque in vsum praedii, ac proinde, quum aquam perennem et perpetuam non habeat, crescere interdum ac defecescere, interdum plane exarescere solet. o) Idque de STAGNO multo magis verum est, quod ita *exficcaripotest, vt fiat ager*. p) Vnde ad lacus, *qui perpetuam habent aquam*, q) quosque alibi PAVLLVS r) *lacus perpetuos* vocat, haec observatio non pertinet. Pergit PAVLLVS, nouoque rem exemplo illustrat: STILLICIDI QVOQVE IMMITTENDI, si illud seruitutis nomen ferat, NATVRALIS ET PERPETVA CAVSSA ESSE DEBET, quippe cuius ea est indoles, vt quis aquam pluuiam ex alterius tecto vel tabulato stillatim cassitantem in aream suam vel recipere cogatur, vel eam auertere in vicini fundum possit. Sed quomodo, quaeso, fingi potest stillicidium tale, quod sine aqua pluuiæ, et de caelo cadente subsistat? Immo

B 2

non

l) Aristotel. *analyt. poster. Lib. I. Cap. VII.*m) Seneca *Consulat. ad Marc. Cap. VII. sequ.*n) Varro *de lingua lat. Lib. III. p. 12.*o) l. 12. pr. D. *de adquir. rer. dom. l. 24. §. vlt. D. de aqua et aqu. plu. arc.*p) l. 10. §. 3. D. *quib. mod. vsusfr. vel vf. amitt.*q) l. vn. §. 3. D. *vt in flum. publ. nauig. liceat.*r) l. 23. §. 1. D. *de seruit. rust. praed.*

non modo fingi, sed et ostendi potest huiusmodi stillicidium, quippe quod apud Romanos frequentissimum fuisse, satis constat. Solebant illi in tectis aedium planis habere nemora et viridia, ceu iam observavit EM. MERILLIVS, s) (sed ex loco VITRUVII t) male intellecto, ubi emendatiores editiones non *telis* sed *telis* habent:) et multo solidioribus argumentis probarunt IO. MEVRIVS et V. C. GER. NOODTIVS. u) Iam quum aqua fontana per aestatem sicciorum rigandae essent illae plantae et arbores: contingere oportebat, ut aqua illa manuarum opera ingesta, inde stillatim in vicini aream cassitaret. Id vero PAVLLVS negat esse stillicidium, quia illius non sit causa naturalis et perpetua.

## §. VIII.

Locus alter  
l. 23. §. 1. D.  
de seru. rust.  
praed. eius-  
que explica-  
tio.

Iungimus huic loco alterum eiusdem PAVLLI, x) ex eodem libro decimo quinto ad Sabinum desumptum, ubi iureconsultus plerisque sua ipse vineta caedere, sibi quae parum constare videtur, dum scribit: *Si LACVS PERPETVVS in fundo tuo est, navigandi quoque servitus, ut perveniat ad fundum vicinum, imponi potest.* En vero, aiunt, idem ille PAVLLVS, quem paullo ante aquaeductum ex vicini lacu concedere noluisse vidimus, iam servitutem navigandi in eo concedere non dubitat: et prius quidem, quia in lacu causa aquaeductus non sit perpetua; posterius, quia lacus sit perpetuus. Sudant hic suo more glossatores, ut, se arbitris, PAVLLVS secum redeat in gratiam, idque ea ratione quam commodissime fieri posse, existimant, si vel ponant, navigandi servitutem non esse continuam, ac proinde aquam in lacu stagnantem huic servituti facile suffecturam, aquaeductum vero aquam lacui adsidue subducere, ut mox non amplius suffectura sit aquaeductui: vel si nobis persuadeant, in favorem navigationis aliquid

s) Em. Merill. *Observ. Lib. I. Cap. XXXIII.*

t) Vitruv. *Architect. Lib. VI. Cap. VI.*

u) Io. Meurs. *de luxu Rom. Cap. XII. p. 32.* Ger. Noodt *Comment. ad Pandect. p. 217.*

x) l. 23. §. 1. D. de seru. rust. praed.



quid indulgisse leges, quod in aquaeductu locum non habeat. y) Sed prior ratio, quam et HVGGO DONELLVS z) probat, admodum diluta est, quia ne aquaehaustus quidem est seruitus continua, et eum tamen in *cisterna*, *LACV*, *piscina*, *puteo*, si *viuam aquam non habeant*, constitui posse, negat VLPIANVS. a) Posterior plane absona videtur, quoniam legislatores publicam quidem nauigationem, qua reipublicae annona, aliaque necessaria subuehuntur, variis priuilegiis dignam iudicarunt: b) siquidem, vti ait CALLISTRATVS, c) *remuneranda visa sunt pericula nauiculariorum, qui annonae urbis seruiunt, quin et praemiis hortanda esse, quia non est absurdum dicere, etiam hos reipublicae causa, dum annonae urbis seruiant, abesse*: nauigationis vero priuatae ex vno fundo in alterum tantus numquam fuit fauor, vt ideo a generali iuris ciuilis principio de perpetua seruitutis causa recedendum videretur. Aliam deinde rationem commentus IO. GOEDDEVS d) PAVLLVM quidem in l. 28. D. de seru. urb. praed. mentionem facere ait *lacus*, sed vere intelligere *stagnum*, quia possessores fundorum sua saepe opinione ac sententia quamlibet aquam collectitiam et stagnantem pro *lacu* habuerint, et sic *stagno* id tribuerint vocabulum: e) lacum autem, proprie sic dictum, perpetuam ac perennem aquam habere, et de eo intelligendum esse locum alterum l. 23. §. 1. D. de seru. urban. praed. Sed non opus est his argutiis. *Lacus* et *stagnum* magnitudine differunt. *Lacuna magna*, teste VARRONE, f) *lacus* vocatur, parua *stagni* nomine venit. *Lacus* porro, seu lacunae magnae duorum sunt generum, alii PERPETVI, quos vel scaturigo quaedam, vel annis riuulusue, ingreditur, alio

B 3

loco

- y) Caepolla de seruitut. Cap. XXVIII. n. 3.
- z) Donell. Commentar. iur. ciu. Lib. XI. Cap. III.
- a) l. 1. §. 4. D. de fonte.
- b) Sueton. Claud. Cap. XVIII. et tot. tit. C. de nauicular.
- c) l. 5. §. 3. D. de iure immunit.
- d) Io. Goed. Comment. ad l. 112. D. de verb. signif. p. 823.
- e) argum. l. 2. l. 3. l. 74. D. de supell. leg. l. 24. §. 2. D. de leg. 1.
- f) Varro ibid. p. 12.

loco ex eo erupturus, quales ex maioribus sunt *Larius*, *Servinus*, *Fucinus*, *Lernanus*, *Acronius*, et alii: alii, qui et scaturigine et riuis carent, qualis *Trafmenus*. Illi perennem ac viam continent aquam, et in talibus PAVLLVS nauigandi seruitutem recte concedit: hiaquam stagnantem, quae seruida aestate facile deficit, vnde MARTIALIS: g)

*Multum, crede mihi, refert, a fonte bibatur,*

*Qui fluit, an PIGRO, quae STVPET, vnda LACV.*

Et in his lacubus nec aquaeductum, nec vllam aliam seruitutem concedit PAVLLVS noster: vradeo nodum in scirpo quaerant, qui PAVLLVM secum ipso committunt, eumque vno eodemque libro lacui causam perpetuam modo tribuisse, modo negasse, contendunt, cum in loco, haecenus enodato, diserte loquatur de *lacu perpetuo*.

### §. VIII.

Locus tertius  
I. 1. §. 4. D.  
de fonte.

Haecenus PAVLLVM de causa seruitutum perpetua differenter audiuius: iam ei merito iungimus VLPIANVM, quocum PAVLLO quidam perpetuas lites intercessisse, eiusque diffidii semina per ius nostrum passim sparsa esse, singunt. h) Vere, an falso, alii viderint: saltim *talia non est, quod tam large nobis obtrudi patiamur*, ceu recte monet V. A. CORN. VAN BYNCKERSHOEK. i) Attamen a PAVLLO manifesto aiunt dissensisse VLPIANVM, dum scripserit: k) *Hoc interdictum de cisterna non competit: nam cisterna non habet PERPETVAM CAUSAM, nec viam aquam. Ex quo adparet, in his omnibus exigendum, vt viua aqua sit. Cisternae autem imbris concipiuntur. Denique constat, interdictum cessare, si locus, piscina, puteus, viua aquam non habeant. Et de lacu quidem, piscina et puteo non est, quod multum laboremus, quum*

g) Martial. *Lib. VIII. Epigr. C.*

h) Merrill. *Observ. Lib. I. Cap. XXXIII.* Bertrand. *vit. iurisperit. Lib. I. Cap. XXV.*

i) Bynkersh. *libr. sing. ad leg. lecta. Cap. XIII. p. 89. edit. nouiss.*

Ant. Schulting. *iurispr. vet. anteuist. p. 558.*

k) I. 1. §. 4. D. de fonte.

eamdem illum seruasse *διαίρεσιν*, animaduertamus, ac PAVL-  
LVM, et hinc de lacubus, piscinis et puteis, *qui viam aquam  
non habent*, diserte loquatur VLPIANVS. At de cisterna ma-  
nifesto illum aiunt a PAVLLO facere diuortium. Quum enim  
hic seruitutis foraminis causam perpetuam agnosceret, *si quid  
eo ex caelo aquae venire posset*, ac proinde regulam poneret,  
*quod ex caelo venit, etsi non adsidue fiat, ex NATVRALI tamen  
caussa fieri, et ideo PERPETVO fieri existimari*: ille cisternam,  
in quam sola aqua pluuia defluit, perpetuam causam habere,  
negat. Et fateor sane, plerosque qui de conciliandis his iu-  
reconsultis laborarunt, parum extricasse. Nam alii non a-  
quam hic seruire censent, sed cisternam, quae, utpote ma-  
nu facta, causam non habeat perpetuam: l) alii vsum tan-  
tum aquae considerandum esse monent, amplius nihil, adeo-  
que, vnde veniat aqua, parum in hac seruitute interesse exi-  
stimant. m) Sed si cisterna, quippe manu facta, seruire  
non potest, neque causam habet perpetuam: qui fit, ut vi-  
cini tigna recte sustineat praedii nostri paries, quum tamen  
et ipse manu fiat, nec magis, quam cisterna, causam per-  
petuam habere videatur? Et quis vsum aquae ab ipsa aqua  
discernat, quum ideo ille non sit perpetuus, quia ipsa aqua  
non est perennis vel perpetua? Hinc videri posset VLPIANVS  
idem quidem cum PAVLLO inculcasse principium, puta quod  
*causam seruitutum perpetuam esse oporteat*, at causam perpe-  
tuam multo aliter, quam PAVLLVM, definiisse. Enimuero il-  
li cum PAVLLO bene conuenisse, aliunde satis constat, veluti  
dum vterque, aquam aliunde, quam ex capite, duci posse,  
negat: n) et dissensus hic adparens per se euanesceat, simul  
ac, quid vterque per CAVSSAM PERPETVAM intellexerit, in-  
fra suo loco ad liquidum fuerit perductum.

§. X.

l) Noodt *Comment. ad Pandect.* p. 222.

m) Vlr. Hyber. *Praelect. ad Pand. Lib. VIII. tit. III. §. VII.*

n) l. 1. §. 7. D. de *agn. quotid. et aestiu.* l. 9. D. de *seruit. vrb. praed.*

## §. X.

Locus quartus l. 29. D. de seru. urb. praed.

Praeter hos duos iureconsultos et tertio, illis haud paullo antiquiori, principium istud de perpetua seruitutum causa placuisse, comperio. Nam et POMPONIVS in libro XXXII. ad Quintum Mucium seruitutem foraminis constitui posse negavit, dum scripsit: o) *Si quid igitur ex eo foramine, ex quo SERVITVS NON CONSISTIT, damnum vicinus sensisset: dicendum est, damni infecti stipulationem locum habere.* Negat ergo POMPONIVS, *seruitutem ex foramine consilere*, ac proinde possessori, cui molestiam adfert illa proluuius, non indulget actionem *negatoriam*, quae alioquin occasione seruitutum datur, p) sed *damni infecti*, quae et alias, ubi locus non est negatoriae, ex POMPONII q) ipsius sententia, solet competere. Ast quamuis in eo PAVLLO calculum adiiciat POMPONIVS, quod foraminis non consistat seruitus: rationem tamen eandem, puta, quod illud causa perpetua careat, hic non adici animaduertimus, adeoque existimare quis posset, eum ex alia ac diuersa ratione ius illud seruitutum numero eximere potuisse. Si enim foramen illud dominantis praedii possessor in suo pariete aperuit: id seruitutis rationem habere nullo modo potuit, quum cuique ex libertate naturali parietem suum perfringere, et fenestras, quot lubitum est, nedum foramen, aperire liceat. r) Sin in pariete vicini, (quam speciem hic format ACCVRSIVS: s) seruitus quidem haec fuit, si vicinus hanc proluuiem se excepturum in aream suam pollicitus est, at non foraminis, verum cloacae, quippe quae nihil aliud est, quam locus concauus, per quem colluuius defluit. t) At quamuis haec speciosa sint: aliunde tamen satis constar, eandem fuisse philosophiam POMPONII, ac PAVLLI, eique et idem

o) l. 29. D. de seru. urb. praed.

p) l. 1. pr. D. si seru. vindic.

q) l. 18. D. de seru. urban. praed.

r) argum. l. 9. D. de seru. urb. praed. l. 8. §. 5. D. si seru. vindic. Wissenb. ad tit. D. de seru. urb. praed. n. 10.

s) Accurf. gloss. ad l. 28. D. eod.

t) l. 1. D. de cloac.

idem principium de caussa seruitutum perpetua, et easdem caussae perpetuae et non pertuae definitiones placuisse. Nam in alio textu *ex libro XXXIII. ad Sabinum* deprompto, ita ait POMPONIVS: u) *Seruitus NATVRALITER, non MANVFACTO laedere potest fundum seruientem: quemadmodum si imbri crescat aqua in riuo, aut ex agris in eum confluat, aut aquae fons secundum riuum, vel in eo ipso, inuentus postea fuerit.* Vbi quod contingit NATVRALITER, ei, quod MANVFACTO fundum seruientem laedit, manifesto opponit, et illud quidem, non hoc, causam perpetuam habere tradit, vt adeo de POMPONII et PAVLLI consensu non videatur dubitandum.

## §. XI.

Et haec quidem sunt loca illa veterum iureconsultorum, quae ad subtile istud principium de caussa seruitutum perpetua praecipue pertinent. Ex iis vero *primum* animaduertimus, principium hoc fuisse antiquissimum, et ipsis adhuc liberae reipublicae temporibus receptum. Nam PAVLLVS haec notauit ad MASSVRIVM SABINVM, qui proxime ab eo tempore absuit; x) POMPONIVS ad Q. MUCIVM SCAEVOLAM, qui multo ante illam reipublicae conuersionem floruit, et in Mariano tumultu anno v. c. DCLXVI periit, C. Fimbriae scelere nefarie interemtus. y) Iam notum est, veteres interpretes aut ipsas auctorum suorum doctrinas proponere ac illustrare, aut easdem refellere verbis disertis. Quum ergo posterius neuter faciat: recte DVARENVS z) Paulli sententiam ipsi Sabino tribuit, et nos adeo eodem iure illam POMPONII tribuere videmur Q. Mucio Scaeuolae. Praeterea haec regula non lege aliqua, aut SCo, aut Principis constitutione, introducta, sed ex iure ciuili strictius accepto deprompta est.

C

Quae-

u) l. 20. §. 1. D. de seru. rust. praed.

x) l. 2. §. 47. D. de orig. iur.

y) Cicero de oratore Lib. III. Cap. III. Excerpta Peiresc. p. 410.

Vellei. Patercul. Lib. II. Cap. XXVI. Appian. de bello ciu.

Lib. I. p. 404. Lucan. Pharsalic. Lib. II. v. 126. sequ.

z) Duaren. Comment. ad l. 28. D. de seru. praed. urb. p. 195. Oper.

Quaecumque enim ad rerum ciuiliū naturam, definitionēs et formam, nec non ad formulas agendi, actusque legitimos pertinent, ea non a recentioribus illis iureconsultis, quorum fragmenta in Pandectis supersunt, sed a vetustissimis, veluti SEX. AELIO CATO, cuius Triperita *veluti incunabula iuris continebant*, nec non ex libris BRVTI, P. MVCII et MANILII, qui *fundasse ius ciuile dicuntur*, profecta sunt. a) Hinc CICERO: b) *Fundus a patre relinqui potest: at vsucapio fundi, hoc est, finis sollicitudinis et periculi litium, non a patre, sed a legibus, relinquitur*. AQUAEDVCTVS, HAVSTVS, VIA, ITER, ACTVS a patre; *sed rata auctoritas harum rerum a IVRE CIVILI*. Et alio loco: c) *De IVRE quidem PRAEDIORVM sancitum apud nos est IVRE CIVILI*. Si ergo tota illa doctrina de seruitutibus, eiusque principia, ex iure ciuili, cuius veteres illi iureconsulti, qui libera adhuc republica floruerunt, auctores sunt, veluti e fonte promanarunt: etiam hoc principium, in quo omnes conspirarunt, non possumus non pro antiquissimo habere. Diximus, quae altera nostra observatio est, in hoc principio omnes conspirasse, quorum in pandectis fragmenta supersunt. Neque enim inter tot interprete, quorum ex scriptis TRIBONIANVS sub titulis libri VIII. *Pandectarum* excerpta collegit, (collegit autem illa ex operibus LABEONIS d) ALFENI, e) PROCYLI, f) CELSI, g) NERATII, h) IAVOLENI, i) IULIANI, k)

AFRI-

- a) l. 2. §. 5. 6. 38. 39. D. de orig. iur.
- b) Cicero pro A. Caecinna Cap. XXVI.
- c) Cicero de offic. Lib. III. Cap. XVI.
- d) l. 21. D. si seru. vindic. l. 19. D. de seru.
- e) l. 17. D. si seru. vindic.
- f) l. 16. D. quemadm. seru. amitt. l. 13. D. de seru. praed. urb. l. 13. D. si seru. vind.
- g) l. 9. D. de seruit. l. 6. D. quemadm. seruit. amitt.
- h) l. 12. D. cod. l. 2. D. de seru. praed. rust.
- i) l. 12. D. de seru. praed. urb. l. 13. D. de seru. praed. rust. l. 4. et l. 5. D. commun. praed. l. 9. l. 14. et 15. D. quemadm. seru. amitt. l. 12. D. si seru. vind. l. 12. l. 16. l. 20. D. de seruit.
- k) l. 22. l. 32. l. 34. l. 37. D. de seru. praed. urb. l. 27. l. 28. l. 31. D. de seru. praed. rust. l. 2. l. 16. l. 18. D. si seru. vind. l. 14. D. commun. praed.

AFRICANI, l) PAPIRII IVSTI, m) POMPONII, CAII, SCAEVOLAE, n) MARCELLI, o) PAPINIANI, p) VLPiani, PAVLLI, CALLISTRATI, q) MARCIANI, r) MODESTINI, s) vel vnus reperitur, qui principium illud de caussa seruitutum perpetua vel verbo perstringat, aut diserte illud, tamquam vanum aut futile, reiiciat. Immo quum alioquin saltim diuersarum sectarum iureconsulti dissentire solent, eiusque dissensus vestigia a TRIBONIANO non potuerint ita conturbari, vt non ea passim deprehenderint viri docti: t) hic nullus inter Proculeianos et Sabinianos dissensus obseruatur. Immo quum PAVLLVM, POMPONIVM, VLPIANVM inter erciscundos, quos vocant, iureconsultos referant, eosdemque tamen in Sabinianorum partem procliuiiores esse obseruent: u) ab his sententiam suam non disungit Proculeianorum acerrimus, NERATIVS, x) qui dum alicubi scribit: *si aquaeductus, vel haustus aquae SVFFICIENS EST, potest et pluribus per eundem locum concedi, vt iisdem diebus vel horis ducatur*, manifesto exigit, vt caussa earum seruitutum sit perpetua, siquidem alias fieri non posset, vt pluribus fuisset.

## §. XII.

Quum ergo haec de perpetua caussa seruitutum doctri-  
na et antiqua omnino, et omnibus vtriusque sectae iurecon-  
sultis communis fuerit, et in eius tamen ad applica-  
tione Ioannis Superioris.

C 2

- l) l. 32. D. de seru. praed. rust. l. 33. cod.
- m) l. 14. D. de seru. praed. urb. l. 17. D. de seru. praed. rust.
- n) l. 20. D. si seru. vind. l. 41. D. de seru. praed. urb. l. 20. l. 22. l. 24.  
D. quemadm. seru. amitt.
- o) l. 10. D. de seru. praed. urb. l. 11. l. 13. D. quemadm. seru. amitt.
- p) l. 6. D. si seru. vindic. l. 4. l. 18. D. de seru. l. 36. D. de seru. praed.  
urb. l. 4. l. 34. de seru. praed. rust. l. 17. D. commun. praed.
- q) l. 16. D. de seru. praed. rust.
- r) l. 1. D. de seru. l. 35. D. de seru. praed. rust. l. 19. D. si seru. vind.
- s) l. 22. D. de seru. l. 12. D. de seru. rust. praed.
- t) Merill. Lib. I. Obseru. Cap. V. sequ. Malcou. de sect. Sabinian.  
et Procul. Cap. ult.
- u) Eu. Otto Papinian. Cap. XI. §. VI. p. 229.
- x) l. 2. §. ult. D. de seru. praed. rust.

tionem non una difficultas emergat: nostrum porro erit, dispicere, quo pacto interpretes recentiores explicare illud principium, et nodos, quos hic et magnos, et plurimos deprehendimus, soluere soleant. Nec tamen hic immorabimur glossatorum, CAEPOLLAE, aliorumque eiusdem commatis scriptorum somniis, qui servitutes continuas cum perpetua earumdem causa turpiter confundentes, principium istud, quod omnium servitutum causa perpetua esse debeat, manifesto deserunt, nec facere possunt, quin discontinuarum, quas vocant, causam perpetuam esse, negent. Saltem eam sententiam et IO. LONGOVALLE, y) qui alias glossatorum errorem de harum servitutum praescriptione erudite refellit, amplectitur, ipse postea refutatus a IO. CORRASIO. z) Agmen ergo hic potius ducat non inelegantis ingenii iureconsultus, IOANNES SUPERIOR, a) Aquitanus, qui quum observasset, ipsam aliquandam servitutum constitutionem CAVSSAE nomine venire, b) non se perpetuam illam servitutum causam rectius credit explicaturum, quam si perpetuitatem illam in ipsa servitutum constitutione voluntateque constituentium quaereret, ut adeo causam perpetuam habere videretur servitus, quia ex die, vel ad diem, vel sub conditione, vel ad certam conditionem constitui nequeat, c) et ita constituta non habeatur pro servitute. Quia vero facile animadvertit, foraminis ius, et aquae haustum ex cisterna, lacu, puteo, piscina, non minus, quam flumen, aliaque praediorum iura, pure constitui posse, et tamen servitutibus non adnumerari: d) adiecit, servitutes et ratione usus esse debere perpetuas, ita, ut et fundus, cui imponitur servitus, eam numquam non possit praestare, aut pati, et alter, cui acquiritur, illa ex naturali vel perpetua

y) Longouall. in *L. imperium* 3. *D. de iurisd. Parte III.*

z) Corraf. *Comment. de servit.* p. 261. *sequ.*

a) Io. Superior *Comment. de servit. ad l. 12. pr. D. de servit. n. 4.*

b) *l. 17. pr. D. de aqu. et aqu. pluuv.*

c) *l. 4. pr. D. de servit.*

d) *l. 28. D. de serv. praed. verb. l. 1. §. 4. D. de fonte.*



rua caussa semper indigeat. Et sic satis perspicue explicari a se posse credidit, cur nec ex cisterna, nec ex stagno, aqua collectitia duci, nec foramen, in imo pariete apertum, pro seruitute haberi possit, et cur neutrius seruitutis caussa perpetua visa sit veteribus.

### §. XIII.

Sed haec viri docti sententia speciosa magis, quam Eius exam.  
solida, videtur. Nam quod ad rationem priorem attinet, nec ea aquaehaustui ex cisterna, lacu, puteo, nec foramini in imo pariete aperto, obstat, quia, uti iam monui, et haec iura pure constitui possunt. Praeterea non ideo pure constituendae sunt seruitutes, quod caussa earum debeat esse perpetua: sed alia plane est eius rei ratio, in quam iam alii cum cura inquisuerunt, e) quamvis vix quisquam rem acu tetigisse videatur. Vera enim ratio non alia est, quam quod praediorum rusticorum seruitutes, tamquam res Mancipi, per *mancipationem*; praediorum urbanorum iura per *iniure cessionem* acquirerentur, f) et hi acquirendi modi inter viros soli essent legitimi. Atqui et *mancipatio*, et *in iure cessio* inter actus legitimos erant, qui nec diem, nec conditionem, admittebant. g) Nihil ergo haec faciunt ad causam seruitutum perpetuam, quamvis in se omnino sint verissima. Posterior IO. SUPERIORIS ratio, si recte explicetur, non longe a veritate abest: at eo sensu, quo eam ipse auctor proposuit, dubiis haud leuibus vrgetur. Sane enim pascua, quibus vicinus aliquando iure seruitutis fruitur, saepe non ita comparata sunt, ut praestari possint, quia sicciore aestate non minus, quam cisternae et stagna, exarescunt. Saepe, uti ait VIRGILIUS, h)

C 3

*Steriles*

e) Guil. Maran. *Paratitl.* p. 259. Merill. *ad tit. de seruit.* p. 637. Tom. III. *Thesour. iur.*

f) Vlpian. *Fragm. tit. XVIII. §. I. III. et XI.*

g) l. 77. *D. de regul. iur. et ibi* Iac. Gothofred.

h) Virgil. *Aeneid. Lib. III. v. 141. sequ.*

*Steriles exuret Syrius agros,*

*Arebunt herbae, et victum seges aegra negabit.*

Sed et saepe constituitur seruitus<sup>i)</sup>, quamvis quis ea non semper indigeat. *Ei fundo, inquit LABEO, i) quem quis vendat, seruitutem imponi, etsi NON VTILIS sit, posse existimo: veluti si aqua alicui ducere non expediret, nihilominus constitui ea seruitus posset: quaedam enim habere possumus, quamvis utilia non sint.* Si seruitus consistit, etiam ex qua nulla ad nos redundat utilitas: qui dici potest, ea semper indigere debere dominantis praedii possessorum? Sic sane iure terram, rudus, saxa iaciendi, positaue habendi ac prouoluendi in alieno fundo non semper indiget praedium, et nihilominus hoc ius vicino recte cedi, obseruat NERATIUS. k) Et quis denique neget, foramine illo, in imo pariete, ex naturali et perpetua causa semper indigere cubiculum, quoniam ita natura comparatum sit, ut pauimenta non possint non sordes et situm contrahere, ac proinde semper prouolenda sint? Quisue dubitet, quin fundus vicinus eam seruitutem semper, et multo quidem facilius, quam cloacam, flumen, stillicidium, praestare ac pati possit? Et tamen seruitutem huiusmodi causam perpetuam habere, negat PAVLLUS: l) idque argumento luculentissimo est, non peruidisse IO. SUPERIOREM veterum sententiam, nec perspicue satis, quid *causae perpetuae* nomine illis venerit, explicasse.

#### §. XIII.

Duareni, Cuiacii aliorumque excussa.

Proximi sint FRANC. DVARENVS, m) IAC. CUIACIUS, n) GUIL. MARANVS, o) ANDR. FACHINEVS, p) et alii, quibus tunc demum perpetuam causam habere videtur seruitus, si res ipsae, in quibus illa consistit, ita sint comparatae, ut, quo-

i) l. 19. D. de seruit.

k) l. 3. §. 2. D. de seru. praed. rust.

l) d. l. 25. D. de seru. praed. urban.

m) Duaren. *Comment. ad d. l. 22. p. 195. Op.*

n) Cuiac. *Observ. Lib. XI. Cap. III.*

o) Guil. Maran. *Paratitl. Dig. p. 250.*

p) Andr. Fachin *Constron. iur. Lib. VIII. Cap. XXII. p. 646.*

quoties collibitum est, iis vti liceat. q) Tales autem non alias esse aiunt quam naturales, non autem opera manuue hominis factas. Sed tametsi haec ipsis PAVLLI verbis satis congruant, nec in se admodum obscura ac difficilia sint: iisdem tamen difficultatibus, quibus ipsa illa PAVLLI *Φιλοσοφήματα*, laborant. Sane enim siue de praedio dominante, siue de seruiente, eas definitiones intelligas: plures dari possunt seruitutes, quae adficiunt res, hominum opera manuque factas, et quas tamen ordine illo mouere nemo umquam ausus est. In seruitute *oneris ferendi*, ex parte praedii dominantis occurrit superior aedium contignatio, quae in alterius pariete vel columna requiescit: ex parte seruientis ipsa columna vel paries, quo vicini onus sustinetur. Neutra res a natura profecta; vtraque manu facta est, et tamen hanc seruitutem nemo umquam causam perpetuam habere, negauit. Si quis nobis obuertat, causam huius seruitutis saltem ex hypothesi esse perpetuam, quia hic dominus praedii seruientis reficere parietem, atque ita efficere teneatur, vt *PARIES ONERI FERENDO, VTI NVNC EST, ITA SIT*: r) respondeo, primum nondum euicū esse, reficiendi obligationem seruientis praedii domino citra pactum incumbere: s) deinde, si vel maxime ea huius seruitutis indoles esset, eam tamen perpetuitatem parietis vel columnae non naturae, quod hi viri docti exigunt, sed operae hominum manuariarum deberi: denique causam perpetuam aequè tribui seruituti *tigni immittendi*, in qua tamen seruientis praedii possessori hoc onus plane non incumbit. Ex quo sane consequitur, vt ne hi quidem viri doctissimi aliquid, quod ad verus istud principium perspicue explicandum pertineat, attulerint, sed omnia aequè adhuc, ac antea, incerta sint, multisque tricis inuoluta.

## §. XV.

- q) l. 1. §. 1. et 5. D. de aqua quotid. et aest. l. 1. §. 4. D. de fonte.  
 r) l. 33. D. de seruis. praed. urban. l. 6. §. 2. D. de seru. vind.  
 s) Eu. Otto ad §. 1. Inst. de seru. et illustris Praeclidis Elem. iur. sec. ord. Pand. Part. II. §. 142.

## §. XV.

Nec non  
Donelli et  
Noodtii ex-  
plicatio.

Progredimur ad HVGONEM DONELLVM, t) qui quum alias DVARENT sui vestigia paene vbique praemat, hic tamen ab iis longius recedit, ἐμψύχησεν in plerisque nactus virum eximium, GER. NOODTIUM. u) Nam hi seruitutes causam perpetuam habere statuunt, primum, si earum vsus ex naturali causa sit perpetuus: e. g. in aquaeductu ex aqua viua et perenni: x) deinde, si eius vsus non quidem continuus ac perpetuus, at res ipsa tamen a natura sit, veluti in stillidii et fluminis seruitute aqua pluuiā, quae non cadat semper, attamen, quia a natura sit, cadere saltem possit: y) denique, si quid manu quidem fiat, sed praedium tamen eiusue pars rei habendae causa comparatum sit. Hinc *ius fumi immittendi* veram esse seruitutem, quia caminus vel fornax, quamuis manu exstruantur, eo tamen consilio habeantur, vt aut ignem perpetuum habeant, aut ad habendum illum semper parati sint. z) Sicubi vero nullum horum attributorum reperiatur: causam non posse videri perpetuam, adeoque in *foramine parietis* non consistere seruitutem, quia aqua manu ingeratur, nec magis eo nomine venire posse *aquaeductum ex stagno vel lacu*, viuam aquam non habente, sed omnia haec iura, rite constituta, obligationis personalis naturam induere. Ex quibus principiis deinde DONELLVS veterem illam vexatamque quaestionem soluit, an *aquae ex castello ducendae, vel per rotam ex flumine tollendae, hauriendae* seruitutes possent constitui? Id enim post multas variationes ait obtinuisset, a) quia castellum vel machina illa hydraulica aquam non gignant, sed eius tantum receptacula et causae motrices sint: b) ipsa vero aqua ex castelloeducta, vel per rotam sublata, tamquam

t) Donell. *Comment. iur. ciu. Lib. XI. Cap. III.*

u) Noodt *Comment. ad Pand.* p. 222.

x) l. 1. §. 4. D. de fonte.

y) l. 28. D. de seru. praed. urban.

z) l. 8. §. 5. D. si seru. vind.

a) l. 9. D. de seru. rust. praed. l. 2. D. comm. praed. urban. et rustic.

b) l. 1. §. 39. D. de aqu. quotid.

quam perennis, causam habeat perpetuam. Denique et *cloacae* causam esse perpetuam, existimat vir eximius, quia cloaca non sit quoduis foramen, ad sordes emittendas apertum, sed locus cauus, aquam de caelo cadentem, sordetque et colluuiem secum vna auferentem, recipiens. c) Neque enim fluere, sed stagnare colluuiem, nisi ab aqua pluuiam auferatur. Vnde *cloacam* dictam, quasi *colluacam*, quae sordes, aqua pluuiam vel alia, perpetua decurrente, sua sponte colluat. d) Sic ergo DONELLVS, pulcre imitatus PAVLLI ratiocinationem, tunc demum *cloacam* causam habere perpetuam, statuit, si quid aquae caelestis eo venire possit. e)

## §. XVI.

Enimuero quod ad duas priores DONELLI definitiones attinet, illae mihi in easdem difficultates incidere videntur, quibus DVARENI et CUIACII sententiam premi, paullo ante ostendimus. Aliquot enim seruitutes vidimus, quae nec continuam, nec possibilem causam a natura habent, et tamen causa perpetua non carere dicuntur, veluti seruitutes *ferendi oneris*, *tignique immittendi*. Quod vero ad tertiam attinet, vir doctus PAVLLVM non explicat, sed manifesto deserit. Quum enim hic diserte id, quod manu fit, causam perpetuam habere neget: f) DONELLVS etiam huiusmodi rebus manufactis tribuit causam perpetuam, si eius rei gratia, cui seruiunt, habeantur, veluti camino, quem fumi causa habeamus. Atqui sic nulla idonea subest ratio, cur in *foramine* illo parietis consistere non possit seruitus, quum et illud eum in finem a possessore praedii dominantis habeatur, ut aqua, proluto pavimento, inde vel recipiatur, vel emitatur. Si regerat aliquis, aquam tamen ipsam, quae per foramen istud effluat, non esse perennem, sed manu in conclauem vel triclinium inferri: ei ego reponerem, ne fumum qui-

D

dem,

c) l. 1. §. 4. D. de cloac.

d) Festus voce *cloaca*. Voss. Etymolog. p. 166.

e) l. 28. D. de seru. praed. urban.

f) d. l. 28. D. de seru. praed. urban.

dem, per caminum emittendum, esse perennem, eumque non minus, quam aquam illam, pauimento infusam, manuarum hominum opera indigere. Fornax, qui ignem perpetuum habeat, vix fingi potest, nec talem in cuius Romani aedificio aliquo repertum crediderim, sed in solo Vestae templo, in cuius foco ad simulacrum caelestium siderum custos imperii flamma perpetuo vigabat. g) Si vero in servitute sumi immit-tendi sufficit, caminum ad ignem habendum semper esse paratum: quidni et altero illo casu sufficeret, foramen semper paratum esse, ad recipiendam emittendamue conclavis vel triclinii proluuiem? Deinde in servitute aquae, e castello du-cendae, vel rota e flumine tollendae, DONELLVS id ad causam perpetuam sufficere censet, quod aqua castello recepta, rotae in sublime euecta, in se perennis et viua sit. Quid ergo si aqua perennis vel fontana manibus in pauimentum ingeratur? Scire profecto peruelim, cur aqua, per rotam in sublime euecta, perennis maneat; manu extracta effusaque in pauimen-tum non maneat? et cur infusa amphoris perennis sit, infusa pauimento viua et perennis esse desinat? Denique et quod de cloaca acute sibi obseruasse videtur DONELLVS, eam sine aqua caelesti, quae sordes auferat, intelligi non posse, id in iure nostro vix reperit praesidium. Quum enim edixisset Praetor: QVO MINVS ILLI CLOACAM, QVAE EX AEDIBVS EIVS IN TVAS PERTINET, PVRGARE LICEAT, VIM FIERI VETO: statim subiicit VLPIANVS: h) Ait Praetor: QVAE EX AEDIBVS EIVS IN TVAS PERTINET. Aedes hic accipere debes pro omni aedificio, hoc est ex aedificio eius in tuum aedificium. Et pau-cis interiectis: i) Quod ait Praetor, PERTINET, hoc significat, quod ex aedibus eius in tuas pertinet, hoc est, dirigitur, exten-ditur, peruenit. Si ergo cloaca ex aedibus in aedes, vel ex aedificio in aedificium pertingit, per eamque locus cauus, subter

g) Flor. rer. Romanar. Lib. I. Cap. II.

h) l. 1. § 8. D. de cloac.

i) l. 1. §. 10. D. eod.,

subter terram depressus, et superne reclusus, vel concameratione clausus, (quod ex *periculoso serui in cloacas descensu* k) eruditi colligunt:) intelligitur: quomodo eo aliquid aquae pluuiæ peruenire poterit? Philologia etiam DONELLI de uoce *cloaca* parum ad rem facit. Potest enim ei a *colluendo* nomen esse, etiamsi sordes stagnantes aqua manu ingesta diluerentur: quum et spurcities omnes *sentinarum colluiones* vocentur ab ARNOBIO, l) aliisque bonis auctoribus. Denique apud VIPIANVM m) nusquam exstat illa cloacæ definitio, quam ex eius verbis extundit DONELLVS: sed cloaca ibi est *locus cauius, per quem colluies quædam fluat*: pluuiæ vero, an alia aqua, diluendæ sint sordes, non expressit iureconsultus, nec quidquam procul dubio interesse, ipse existimauit.

## §. XVII.

Attingit hanc quaestionem etiam M. AVREL. GALVANVS, n) Interpretatio vir eruditissimus, et, quod caput rei est, interioris iurisprudentiæ quidam veluti promus condus. Dum enim de usufructu capione usufructus, reliquarumque seruitutum differit, ostenditque luculenter, seruitutes omnes longo tempore acquiri posse, et textum tamen PAVLLI, sæpe laudatum, o) sibi quodammodo obstare animaduertit, hoc dubium ita soluit: *Sed optime responsum est, foramen non acquiri, non quod seruitutes tempore acquiri nequeant, sed quia perpetuam causam non habeat, qualem habere debent omnes seruitutes, ut ibidem exprimit PAVLLVS, et recte: nam seruitutes reales, sicut adficiunt prædium; quod perpetuum est, ita ipsæ causam habere debent perpetuam, ut perpetuo illud adficere possint.* Et alio loco, ubi de oppignoratione seruitutum erudite disputat: p) *Seruitus*

D 2.

inquit,

k) l. 54. pr. D. de act. emt. vend.

l) Arnob. adu. gentes Lib. V. p. 151.

m) l. 1. §. 4. D. de cloac.

n) M. Aur. Galuan. de usufructu Cap. XII. §. V. p. 119.

o) d. l. 28. D. de seru. præd. urb.

p) Galuanus ibid. Cap. XXXVIII. p. 199.

inquit, non nisi in perpetuum recte constituitur: q) *sive, quia iungitur praedio, et sit quodummodo pars vel qualitas, adficiens ipsum praedium, quod naturaliter perpetuum est: sive quod constituitur servitus ad perpetuam utilitatem praedii dominantis, quod suapte natura non modo nunc, sed etiam semper desideratum est, v. g. iter, actum, viam, aquaeductum. Quamobrem et causam perpetuam debet habere.* r) Ergo causam perpetuam GALVANO habere videntur iura, quae praedium perpetuo possunt adficere: quae vero non sunt in ea causa, ex eius sententia carent causa perpetua. At, quatenam iura praedia perpetuo adficere possunt, vel non possunt? Abrumpit hic utrobique sermonem GALVANVS, ubi minime oportebat. *Adficere* sane praedia perpetuo videntur omnia iura, praediis ita imposita, ut illis in omne tempus haereant, et tamquam onera realia ad omnes possessores transeant, s) nec quidquam videretur interesse, naturales habeant causas, an legibus et conventionibus debeant originem. Et sic recte intelligere mihi videor, quid inter obligationes possessorum, et servitutes, ipsis praediis impositas, intersit: at ex eo me nondum percipere fateor, quatenam sit causa servitutis perpetua. Quid enim obstat, quaeso, quominus et foramen in imo pariete apertum, si ius illud ibi habendi in perpetuum concessum sit, praedium perpetuo adficere dicatur? Praeterea vir doctus et constitutionem servitutum puram cum causa earundem perpetua confudisse, et illam quorundam opinionem, quod servitutes sint qualitates a praedio inseparabiles, adoptasse videtur, quam refellens GUIL. MARANVS: t) *Non est verum, inquit, servitutum qualitates, semel impressas, non facile auelli, repugnat enim titulus: quemadmodum servitutes amittantur.*

## §. XVIII.

q) l. 4. D. de servitut.

r) d. l. 28. D. de serv. praed. urban.

s) l. penult. §. ult. D. si servit. vind.

t) Guil. Maran. Paratitl. Digest. p. 259.



## §. XVIII.

Eorum, qui nouissime subtilem istam iuris regulam explicare conati sunt, haud postremus est vir celeberrimus, <sup>Hypothesis</sup> <sup>celeberrimi</sup> VLK. HVBERS. u) Is vero primum veteribus merito placuisse ait, causas seruitutum esse perpetuas. *Debere enim eas rebus inhaerentes, et inter quosuis possessores valituras, praediorum naturae esse congruas, adeoque durare, quamdiu res et praedia durent.* Qua in re cum GALVANO omnia conueniunt viro eximio. Hinc, reiecta vulgari seruitutum continuuarum et discontinuarum distinctione, non omnes quidem seruitutes continuum, aequabilem, et non interruptum usum habere, fatetur, omnium tamen causam perpetuam esse debere contendit. At difficile explicatu esse ait, cur foraminis perpetuam causam esse negarit PAVLLVS, quum tamen ille perpetuitatis defectus in exercitio iuris, non in aptitudine, consistere videatur. Quamobrem de specie, quam iureconsultus ob oculos habuerit, sollicitus, probare videtur sententiam ACCVRSII, qui foramen illud in pariete praedii non dominantis, sed seruientis, existisse existimat. Denique quum animaduerneret, ex PAVLLI sententia non aliam causam esse perpetuam, quam quae a natura sit, et plures tamen seruitutes a possessore praedii dominantis non nisi manuum pedumque opera posse exerceri, e. g. iter, actum, viam, ceteras: expensis omnibus, quae huc facere videbantur, subductisque rationibus, hanc demum facit cogitationum suarum summam: *Seruitus omnis debet habere causam perpetuam, hoc modo, ut loci seruientis conditio semper idonea sit ad usum seruitutis, nec ad illum procurandum manu sit opus. Quo minus hi, quibus competit seruitus, manus pedesue moueant, ad eam exercitandam, nihil vetat, et necessarium est.* Siue ergo dominans manu aliquid faciat, nec ne, perinde est, modo ex parte seruientis nihil manu fieri oporteat, ad usum seruitutis alteri procurandum: id enim contra naturam seruitutum est.

D 3

set

u) Huber. Praelect. ad Dig. Lib. VIII. tit. IIII. §. VI.

set futurum, quae non patitur; ut possessor praedii feruientis aliquid faciat in alterius utilitatem. Hoc posito, omnes difficultates statim evanescere, existimat. Nam *iter, actum, viam*, non posse quidem, nisi pedum opera, exerceri: at loci tamen feruientis naturam semper eiusmodi esse, ut ad recipiendum feruitutis usum parata sit. In *foramine* vero illo locum feruientem non esse aptum ad exercitium feruitutis, nisi aqua idemidem in locum istum ingeratur. Porro ad *sumum immittendum* manu quidem dominantis, at nulla feruientis opera opus esse. Quod vero ad *cisternam* attineat, in illam quidem aquam de caelo cadere, at causam tamen aquae *hauus* ideo non esse perpetuam, quia ibi solus usus aquae e cisterna hauriendae consideretur, amplius nihil: locum autem feruientem esse cisternam, quae non semper idonea sit ad aquam hauriendam. Si quis autem ius aquam deriuandi in cisternam vel in foramen constituere velit, iam nihil ob stare, quod non semper aqua in eam cadat, quum potentia et aptitudo semper adsit aequabilis, idque ad perpetuitatem causae sufficiat.

#### §. XVIII.

Sed quamuis haec satis plana visa sint viro doctissimo, et vere nemo illo a scopo propius absit: vereor tamen, ut illa, nisi paullo aliter explicentur, tot nodis dissoluendis sufficiant. Primum equidem, quod attulit, feruitutem tamdiu durare debere, ac ipsa praedia, magis tamquam rationem, cur haec regula recepta sit, quam tamquam definitionem causae perpetuae, attulisse videtur: nec opus est ut hic repetamus ea, quae de M. AVRELII GALVANI idem fere tradentis, sententia monuimus. Deinde, ut ad ipsam HUBERI regulam perueniamus, ea sane non absone, sed analogiae iuris conuenientissima est, nec vlla umquam dari potuisset planior, si tot exempla, quae in contrarium vulgo adferunt, commode inde possent explicari. At ea recepta, non minus, quam antea obscura manet illa PAVLI de foramine decisio. Nam et in co-

manuaria opera non feruientis, sed dominantis, opus est, si, quod vulgo statuunt, aquam, proluto pavimento per illud

in

Quaedam  
circa illam  
dubia.

in vicini aream emissam esse, ponantur. Seruiens hic nihil facit, nec aquam ingerit pavimento, sed eam tantum, effluentem e foramine, recipit in aream suam: nec quisquam dubitabit, quin loci seruiens, puta areae, conditio semper ac naturaliter idonea sit ad usum huius seruitutis praestandum. Cur ergo in eo minus consisteret seruitus, quam in camino, per quem fumus emittitur? Ipse sane vir eximius, non aliter hunc nodum soluere potuit, quam noua plane specie acute excogitata, in qua fingit, fontem aut flumen in aedibus vicini esse, ex quo liceat per foramen, in ipsius vicini pariete apertum, et tubos illi insertos aquam pavimenti nostri proluendi causa educere. Sed talem speciem vix umquam occurrere crediderim. Praeterea in tubulos illos aqua aut dominantis, aut seruiens manu ingerenda esset. Si prius: seruitus erit ex principio celeberrimi HVBERTI, quia nihil obstat, quo minus manum pedemue moueat is, qui seruitutem exercet: sin posterius: non erit seruitus, non ideo tamen, quod causam non habeat perpetuam, sed quod seruitus in faciendo consistere non potest. Ceterum neminem fatemur ipsam speciem rectius peruidisse celeberrimo HVBERO, idque infra pluribus demonstrabimus.

## §. XX.

Facere porro non possumus, quin et IO. SCHILTERI, Schilteri sententiam audiamus. Is enim de hac quaestione ex instituto disputans, x) primum praemittit, quando CAVSSA seruitutis PERPETVA requiratur, non intelligi *finalem*, quae et in foraminis iure sit perpetua, puta, perpetua sordium auersio: neque *efficientem*, id est, personas seruitutem constituentes ac exercentes, mortales profecto, ac proinde non perpetuo inter homines futuros: neque *formalem*, quae in iure ac potentia morali consistat: neque denique *materialem*, quatenus ea denotetur subiectum, cui inhaereat seruitus, puta praedium: sed causam

x) Schilter. exercit. XVIII. §. XIII. sequ.

ſam *materielem*, circa quam recipiendam auertendamue ſeruitutis exercitium occupetur, veluti aquam, lumen, fumum. Ac proinde *ius illud foraminis* ex mente SCHILTERI primario verſatur circa ſordes pauimenti: ſecundario etiam circa aquam, qua ſordes abluantur: ac proinde aqua in proluendo pauimento et materiae, et cauſae instrumentalis, rationem habet. Iam ergo ipſe format regulam: *Si quando ad comparandum obiectum ſeruitutis quoties ea vti volumus, manu operaque hominis opus eſt; cauſa ſeruitutis non eſt perpetua: quoties vero illud ſeruitutis obiectum a natura eſt, toties ipſa ſeruitus cauſam perpetuam habere intelligitur.* Hinc porro colligit vir doctiſſimus, *foraminis* iſtius *ius* non habere cauſam perpetuam, quia aqua hominis opera ingerenda ſit: nec aquae ex lacu vel cifterna hauſtum, quia *lacus* idem ſit ac *cifterna* y) vel *fossa*, quippe receptaculum aquae manu factum. z) Praeterea ex *caſtello* aquaeductum ſtricto iure non conſiſtere, nec *ius aquam per rotam e ſummine tollendi* ſeruitutis nomen ſtricto iure mereri, quia et caſtellum, vel diuidiculum et conceptaculum, a) et machina iſta hydraulica, non niſi manu fieri poſſit. Denique et de ratione huius regulae ita philoſophatur vir eximius: b) *Ex tali igitur aqua non placuit iure conſultis Romanis ſeruitutem aquaeductus conſtitui poſſe. Cuius rei ratio neque inepta eſt, neque nimium ſubtilis, ſed facilis cognitu et aperta. Quum enim contra libertatem Quiritium eſſet, et hinc contra naturam ſeruitutum, vt cogeretur vicinus aliquid facere in ſuo: hoc ipſum inconueniens ſequutum eſſet, ſi ſeruitus aquaeductus ex aqua ea conſtitueretur, quam vicinus opera ſua ſuisque ſumtibus colligere et conſeruare teneretur praedio dominantis. Quodſi vero aqua pluvia in pavementum meum caſſitare poterit, illudque ita proluo, et porro per foramen in praedium vicini egero: tunc quia cauſa eſt perpetua et natu-*

*ralis,*

y) l. 21. §. 5. D. de furt. Cuiac. Obſeru. lib. X. Cap. VIII.

z) Alciat. Commenc. in l. 113. D. de verb. ſignif.

a) l. 2. C. Theod. de aquaed. et ibi Iac. Gothofred.

b) Schilter. Exerc. XVIII. §. XIII. p. 143.

*ralis quotiescumque pluit, sese exserens, non demum ab hominis arbitrio atque opera immediate pendens, ideo seruitus constitui potest.* Haec SCHILTERVS, satis verbose, et, vti solet, obscuriuscule: quae, qualia sint, paucis expendere iuuabit.

## §. XXI.

Hic primum animaduerto, si viro celeberrimo ea, quae *Eius examen.* de caussarum distinctione disputauit, omnia largiamur: easdem tamen difficultates, quae reliquas hypotheses premunt, nihilominus adhuc superfuturas. Quod facile intelligetur, si quis *aquae haustum e cisterna* SCHILTERI methodo expendere paullo accuratius. *Eius caussa efficiens* sic erunt personae hoc ius constituentes atque exercentes: *formalis* ipsum ius potentiaeque moralis aquam hauriendi: *subiectiua* cisterna, quam id ius adficit: *obiectiua* seu materia circa quam aqua pluuiæ, e cisterna haurienda. Iam porro ad aquam illam comparandam, quae sua sponte in cisternam destuit, non opus est manuaria hominis opera: immo potius illa de caelo, non assidue quidem, at naturaliter tamen, cadit, vel, vti VLPIANVS c) loquitur, *imbribus concipitur.* Habebit ergo iste aquae haustus causam perpetuam, adeoque non magis seruitutum ordine erit mouendus, quam ius foramen in imo pariete habendi, si *quid eo aquae caelestis veniat*: d) et id tamen est, quod negare VLPIANVM. vidimus. Deinde verum quidem est, ad prouoluendum pauimentum aqua opus esse, ab homine ingerenda: at itidem opera manuaria opus est ad exercendas seruitutes *tugurium in alieno positum habendi*, e) *terram, rudus, saxa iaciendi, posita habendi, prouoluendi in alieno*, f) *sterculinium ad vicini parietem habendi*, g) et plerasque similes: nec tamen quidquam impedit, quo minus haec iura seruitutum nomen ferant. Quod porro de lacu hic differit SCHILTERVS, per

E  
illum

c) l. 1. §. 4. D. de fonte.

d) l. 28. D. de seru. praed. urb.

e) l. 6. §. 1. D. de seru. praed. rust.

f) l. 3. §. 2. D. eod.

g) l. 17. §. 2. D. si seru. vind.

illum intelligi *cisternam* vel *fossam*, vix est, vt admitti possit. Nam in textu, quem eam in rem adducit, h) mentio quidem fit *cisternae vini*, et CUIACIVS i) ibi erudite notat, *cisternam vini* Graecis dictam esse *λάκων*, quod et CLAVD. SALMASIVSK) exemplis firmavit: immo addere possum, ipsos Latinos vasa, in quae mustum exsudent torcularia, *lacus* adpellasse, veluti COLUMELLAM l) et OVIDIVM, m) cuius notissima sunt verba:

*Qui petis auxilium, non grandia diuide necum*

*Praemia, de LACVVS proxima musta tuis.*

Sed inde non sequitur, vt et in l. 28. D. de seru. vrb. praed. lacus cisternam notet, nisi quis tantam in vllum hominem credat cadere insaniam, vt aquaeductum sibi ex cisterna cedi velit, vel vt sibi fingat cisternam, quae aquam viuam habeat. n) *Lacum* porro esse *fossam*, nusquam dixit ALCIATVS, immo potius ille *lacum* a *fossa* diserte distinguit, et illum, a natura factum, aquae perennis; hanc manu excavatam, aquae collectionis receptaculum esse scribit. o) Praeterea si *ius aquam rota e flumine tollendi*, et *aquaeductus e castello* seruitutes vocari nequeunt, quia machina illa hydraulica et castellum manu sunt: qui sit, vt seruire possit paries, itidem manu factus? et quomodo credere possumus SCHILTERO, per causam seruitutum perpetuam intelligi efficientem neganti, quum machina illa, qua aqua euehitur, non sit obiectum eius seruitutis, sed causa efficiens minus principalis, quam vocant philosophi, vel instrumentalis, materia vero, seu obiectum sit aqua fluuiatilis, quam causam perpetuam habere, nemo temere negauerit. Denique ne ea quidem, quibus rationem huius regulae reddere voluit vir doctissimus, magis solida videntur.

Fateor

b) l. 21. §. 5. D. de furt.

i) Cuiac. Obseru. Lib. X. Cap. VIII.

k) Salmat. Exercit. Plinian. Tomo I. p. 320.

l) Columell. de re rast. Lib. XII. Cap. XXVIII.

m) Ouid. Lib. III. Fast. v. 888.

n) l. 1. §. 4. D. de fonte.

o) Alciat. ad d. l. 112. D. de verb. sign.

Fateor, naturae seruitutum id repugnare, si quis facere aliquid in suo cogatur: at idem hoc libertati iuris Quiritium repugnasse, nondum me intelligere fateor. Romani enim, salua illa libertate sua, alteri quotidie promittebant, se non modo daturos, sed et facturos aliquid in stipulatoris gratiam: p) quamuis eiusmodi obligatio ad faciendum seruitutis nomine non veniret. Denique non adeo magni momenti est, quod ex aquaeductu e castello vel aquaehaustu e cisterna meruit vir doctissimus, incommodum, puta quod ita alius teneretur aquam opera sua suisque sumtibus colligere. Nulli enim sumtus a seruiente sunt in aquam comparandam, quippe vltro e caelo cadentem, vel ex fonte vel flumine in castellum sponte defluentem, sed in cisternam vel castellum, quae tamen pro obiecto horum iurium, ipso fatente SCHILTERO, haberi non possunt: vt adeo hoc non magis seruitutum naturae repugnet, quam quod paries, cui tigna immittuntur, non nisi manu fieri possit.

## §. XXII.

Quae quum ita sint, vix credo vllum iureconsultum magis ingenue ac libere dixisse sententiam, viro celeberrimo, CHRISTIANO THOMASIO. q) Hic aliam plane ingressus viam, secavit nodum, quem ab aliis tam male solui, animaduertit. Quum enim, quo erat acumine, male cohacere existimaret non modo interpretum, sed et ipsorum veterum iureconsultorum, doctrinas, nec causam satis idoneam excogitare posset, cur aqua pluuia, e foramine imi parietis eiecta, causam perpetuam habere, hausta e cisterna, eandem non habere dicatur, et cur ibi aqua, manu pauimento ingesta, non sit obiectum seruitutis idoneum, fumus vero, hominis opera excitatus, pro tali omnino habeatur: hanc demum facit cogitationum suarum summam: r) *Igitur, vt dicam, quod sentio: DIS-*

Iudicium ce-  
leberrimi  
Thomasii.

E 2

SENSE-

p) l. 72. pr. l. 75. §. fin. l. 81. l. 112. §. 1. D. de verb. obligas.

q) Thomaf. Diff. Lips. XV. de seruitute stilicidii §. XXVI, sequ.

r) Ibid. §. XXXIII.

SENSERVNT antiqui iureconsulti inter se circa regulam, an servitutes debeant habere perpetuam causam? quibusdam, qui nimiam ac fere metaphysicam subtilitatem sectabantur, id adfirmantibus, aliis vero et plerisque id negantibus. Hunc dissensum TRIBONIANVS centonibus Pandectarum inseruit, et ita cruce interpretibus fixit, quum tamen temporibus ipsorum iureconsultorum, qui istas subtilitates defendebant, adfirmantium sententia fuerit explosa. Quum ergo semel, tamquam fixum ac firmum, posuisset vir celeberrimus, quod tamen nullo idoneo argumento probauerat, quosdam tantum subtilioris ingenii iureconsultos hanc regulam de causa servitutum perpetua esse amplexos, reliquos omnes eandem, tamquam absonam, explosisse: licere ipse sibi credidit, posteriori sententiae adiiungere calculum, et, quum suffecisset, si non omnes servitutes causam perpetuam habere, ostendisset, defendere sententiam ausus est plane contrariam: NULLAM SERVITUTEM DEBERE HABERE CAUSAM PERPETVAM. s) Quod tamen *βίμα παρὰ δόξαν* vir doctissimus non aliis argumentis probavit, quam quod et ANTONINVS Imp. t) subtilem illam regulam rescripto aboleuerit, et PAVLLVS u) ipse illam, saltem in servitute aquaeductus, non amplius obseruatam esse, fateatur, et hodie eius rationem non amplius haberi, obseruari SCHILTERVS x) cui nos GROENEWEGIVM, y) CASP. MANZIVM, z) IO. BRUNNEMANNVM, a) GER. GOTTL. TITIVM, b), et SAM. STRYKIVM c) addimus, qui postremus illum in praxi rideri ait, qui ius istud habendi foramen hodie pro servitute non agnoscat, si vel maxime nihil eo aquae pluviae ex caelo veniat.

## §. XXIII.

s) Thomaf. *ibid.* §. XXXV.t) l. 2. D. *comm. praed. vrb. et rust.*u) l. 9. D. *de seru. praed. rust.*x) Schilt. *Exerc. XVIII.* §. XVI.y) Groeneweg. *de legib. abrog. ad l. 28. D. de seru. praed. vrb.*z) Manz. *ad tit. D. de seru. praed. vrb. n. 108.*a) Io. Brunnem. *ad l. 28. D. cod. n. 3.*b) Tit. *Obseruat. ad Lauterb. CCXXXVIII.* n. 3.c) Stryk. *Vf. mod. Dig. Lib. VIII. tit. II. §. XVIII.*



## §. XXIII.

Quamuis yero haec erudita sint, et veteres iure-consultos omnino in multis dissensisse, nemo temere negaturus videatur: tamen iam ab aliis obseruatum est, non temere fingendum esse huiusmodi dissensum, vbi eius non clara et expressissima exstent vestigia, nec tantum odium concipi debere aduersus Tribonianum, vt eum vbique caecutiisse, ac vigilantem veluti dormitasse existimemus. Eleganter, vti solet, vir amplissimus, CORN. VAN BYNKERSHOECK: d) *Sed quid tandem*, inquit, *de emblematicis*, (adde et de aliis, qui TRIBONIANO exprobrantur, erroribus,) *dicemus?* *Vetus prouerbum est*, inquit VLPIANVS: e) ἔτι πάντα, ἔτι πάντες, ἔτι πᾶσι πάντων, neque omnia, neque passim, neque ab omnibus. Sic et nos de emblematicis. Omnia agnoscere, stultissimum; passim, turpissimum; et ab omnibus impudentissimum. Quemadmodum vero, vt supra discam, ipsius iurisprudentiae interesset, nullum omnino dari emblemata: ita et interesse, dari quam paucissima. Quapropter nos non oportet esse liberales in his vel temere iactandis, vel anxie inuestigandis: quin nec ullum largiendum, si res aliter salua esse possit: et, an possit, tentanda prius omnia, omnis mouendus lapis. Sedulo imprimis cauendum, ne integros partus suppositos dicamus, vel eorum quoque emblematum, ultra quam necesse est, finis prodigi. Quod graue, viroque prudente dignissimum iudicium quum nemo hodie solide doctus non probeat: merito ego vereor, vt hac in re THOMASIO celeberrimo adsentiri quisquam possit. Circa regulam hanc veteres fere omnes consensisse, iam supra vidimus. Agnouere eam non modo PAVLLVS, VLPIANVS, POMPONIVS, quos in SABINIANORVM partes fuisse proniores, censent, verum etiam ex PROCVLIANIS NERATIVS, f) nec vllus veterum potest laudari, qui vel verbo hoc principium reprehenderit, vel aliqua solum deci-

E 3

fione

d) Bynckersh. praefat. nouissimis obseru. iur. praemissa pag. VIII.

e) l. 6. §. 1. D. de offic. Procos.

f) l. 2. §. ult. D. de seru. praed. rust.

sione contraria ostenderit, sibi id principium, subtile, abso-  
 num, metaphysicum, videri, quamquam, etiamsi conce-  
 dendum esset, veteres in adplicatione huius regulae isti diuer-  
 sa concessisse, (quod de VLPIANO et PAVLLO vulgo existimant:) inde tamen minimè colligendum esset, de ipsa regula, ad-  
 mittendane illa sit, an explodenda, eos dissensisse. Quam  
 saepe enim et hodie contingit, vt iureconsulti etiam doctis-  
 simi in adplicando iure discrepent sententiis, quum tamen  
 de ipso iure eiusque genuino sensu amice consentiant? Id  
 vero et olim contingere potuisse, quis negauerit? Porro do-  
 ctrina illa, *quod nulla seruitus causam perpetuam requirat*, ta-  
 metsi hodie vera fortassis esse possit, non tamen vel ex re-  
 scripto ANTONINI, g) vel ex PAVLLI h) testimonio, recte pro-  
 batur. Quod enim ad prius attinet, primo ex textu non pat-  
 tet, hoc ius iureconsultum ideo seruitutibus iure validis ad-  
 numerare noluisse, quod causam non haberet perpetuam.  
 Deinde tantum abest, vt rescripto illo tamquam nugatoria  
 explodatur haec regula, vt eam diserte pro iuris principio  
 agnoscat Imperator, dum rescribit: *Licet SERVITVS* (aquam  
 rota e flumine tollendi), *IVRE NON VALVERIT: si tamen hac*  
*lege compararit, seu alio quocumque legitimo modo hoc ius ad-*  
*quisiuerit, TVENDVM esse eum, qui hoc ius possedit.* En vero,  
*seruitutem iure non valuisse*, fateatur Imperator: at *tvendum*  
*tamen esse eum*, qui huiusmodi ius legitimo modo adquisitum  
 quasi possederit, monet. Nimirum iam supra obseruauimus,  
 seruitutes olim inter viuos vel *mancipatione*, vel *in iure ces-*  
*sione*, adeoque sollemni ritu interueniente, fuisse adquisitas.  
 Quamuis vero et aliis modis adquiri possent, veluti *pactioni-*  
*bus*, cum subsequente quasi traditione coniunctis, i) *prae-*  
*scriptione* k) immo et *ultimis voluntatibus*, l) inter hos ta-  
 men

g) l. 2. D. *comm. praed. urb. et rust.*

h) l. 9. D. *de seru. praed. rust.*

i) §. 4. *Inst. de seru.*

k) l. ult. C. *de praescrip. long. temp.*

l) l. 16. D. *comm. praed. urb. et rust.*

men acquirendi modos, recte id obseruante GUIL. MARANO, m) magna differentia obseruatur. Legitimis enim modis, et secundum regulas iuris adquisita seruitus ipso iure valebat, aliter adquisita et constituta per TVITIONEM PRAETORIS sustinebatur. Hinc VLPIANVS: n) *Illud sciendum, siue iure ipso vsusfructum quis habeat, siue etiam per TVITIONEM PRAETORIS, cogendum esse fructuarium cauere, aut actiones suscipere.* Et alibi: o) *Parui refert, utrum iure sit constitutus vsusfructus, an vero TVITIONE PRAETORIS.* Legitimi autem modi olim tres erant, MANCIPATIO, IN IURE CESSIO, et LEGATVM VINDICATIONIS: p) hodie vnus tantum, puta *legatum*: quo solo modo adquisita seruitus ipso iure valet. Et hinc alio loco *vsusfructum iure LEGATI, et per TRADITIONEM vel STIPVLATIONEM vel alium quemcumque modum constitutum*, sollicite ab VLPIANO q) distingui, eundemque alibi r) diserte notare animaduertimus, *traditionem et patientiam seruitutum inducere OFFICIVM PRAETORIS*, id est, hunc constituendi modum id efficere, vt Praetor eam seruitutem sustineat, et quasi possidentem tueatur. Sola ergo per *legatum* relicta seruitus ipso iure valet: reliquis constituta modis per *tuitionem Praetoris*: idemque etiam obtinet, si quid in constituenda seruitute contra alias regulas iuris civilis fuerat admissum. Hinc PAPINIANVS: s) *Seruitutes ipso quidem iure neque ex tempore, neque ad tempus, neque sub conditione, neque ad certam conditionem, (verbi gratia, quamdiu volam,) constitui possunt: sed tamen, si haec adiciantur, PACTI vel per DOLI EXCEPTIONEM occurreret contra placita seruitutem vindicanti.* Tuetur enim aliquem Praetor, quum iure ciuili defi-

m) Guil. Maran. *Paratit. Digest. p. 357. sequ. Add. Ger. Noode de vsufr. Lib. II. Cap. II. p. 450. Tom. I. Op.*

n) l. 9. §. 1. D. *vsufr. quemadm. cau.*

o) l. 1. pr. D. *quib. mod. vsufr. amitt.*

p) Paull. *recept. sent. Lib. III. Tit. VI. §. XVII.*

q) l. 25. §. ult. D. *de vsufr.*

r) l. 1. §. 2. D. *de seruit. praed. rustic.*

s) l. 4. D. *de seruit.*

deficiente ipse ex sua iurisdictione actiones, exceptiones, cautiones, interdicta, prout res exigit, accommodat, ut adus aliquis civilis, iure stricto et rigido non valiturus, subsistat. t) Iam ergo facile intelligitur, quid sibi velit ANTONINVS Caracalla, Imp. u) De aqua per rotam tollenda ex flumine, vel haurienda, vel si quis servitutem castello imposuerat, quidam dubitabant, ne hae servitutes non essent. Relata re ad principem, sequutum est rescriptum. Quale vero? an quod dubitationem illam, tamquam ridiculam, et paene metaphysicam subtilitatem iureconsultorum, explodit, vel illam de causae servitutum perpetuitate regulam plane abrogat? Minime vero. Potius recte dubitatum ea de re esse fateretur Imperator. SERVITUTEM enim hanc ipso IVRE NON VALERE: *si tamen hac lege compararit, aut alio quocunque legitimo modo sibi hoc ius adquisiverit, TVENDVM ESSE eum, qui hoc ius possedit.* Et ita etiam alter textus PAVLLI x) est intelligendus. *Servitus aquae ducendae vel hauriendae, nisi ex capite vel fonte* CONSTITVI NON POTEST, (quia causa non foret perpetua:) *HODIE tamen ex quocunque loco constitui solet:* non quod regula illa de causa servitutum perpetua explosa sit, sed quod possessorem tueatur Praetor, qui toties succurrit possessori-bus, quoties contra rigidiores iuris civilis regulas aliquid factum esse dicitur. Quemadmodum ergo non ideo sublatum dici potest ius civile, quod possessionem, vi, clam, vel precario adprehensam, pro vitiosa habet, quia Praetor tuetur eum, qui cloacam, qua vi, clam vel precario ab altero usus est, vult reficere: y) ita nec vetustissima illa regula ideo abolita dici potest, quod servitutes quaedam, contra illam constitutae, TVITIONE PRAETORIS sustinentur.

## §. XXIII.

t) l. 20. D. de servit. l. 11. §. 1. D. de Publ. in rem act. l. 41. D. de adquir. rer. dom.

u) l. 2. D. commun. praed. urb. et rust.

x) l. 9. D. de serv. urban. praed.

y) l. 1. §. 7. D. de cloac.

## §. XXIII.

Vt ergo demu, quid mihi, haec omnia diligentissime inter se comparanti, in mentem venerit, perspicue exponam: primum repeto, quod supra me demonstrare memini, esse hanc regulam non nouam, et vel a PAVLLO, vel ab villo alio recentiore iureconsulto, excogitatam, sed veterissimam: non vnus alicuius, vel auctoris, vel scholae, propriam, sed omnibus communem; non denique ostentandi ingenii causa ab aliquo inuentam, sed ex ipsa iuris ciuilis analogia sua sponte natam atque expressam. Quemadmodum iuris ciuilis, quod a prudentibus perpolitum nouimus, hoc erat praecipuum officium, vt negotiis ciuilibus certam formam circumdaret: ita eandem operam seruitutibus nauasse iureconsultos, constat. Et haec est illa *seruitutum natura*, *z) certumque seruitutum genus*, a) cuius in legibus nostris passim fit mentio. Nimirum seruitutes aut PERSONARVM sunt, vt vsus et vsusfructus, aut RERVM, vti seruitutes rusticorum praediorum et vrbano- rum. b) Vtroque casu res vel fundus SERVIRE, c) immo SERVVS esse, vel SERVIENS dicebatur, ac proinde aedes SERVAE et PRAEDIA SERVA cum apud CICERONEM, d) tum apud veteres iuris auctores, e) passim memorantur. Attamen inter vtriusque generis seruitutes tantumdem paene interest, quantum inter statuliberorum et seruorum reliquorum conditionem. Quemadmodum enim illi seruebant quidem, ad statutam tamen in certum tempus vel conditionem libertatem habebant, f) hi vero ita dominis erant obnoxii, vt perpetuam seruitutem seruire cogerentur,

F

nisi

- z) l. 15. §. ult. D. de seru. l. 32. fin. D. de seru. praed. vrb.  
 a) l. 8. §. 1. D. si seru. vind.  
 b) l. 1. D. de seruit.  
 c) Cicero de offic. Lib. III. Cap. XVI. l. 3. §. 2. D. de aqua quotid. l. 57. D. de vsufr. l. 2. §. ult. D. de aqua et aqu. plu.  
 d) Cic. de lege agrar. Cap. II.  
 e) l. 6. §. 1. D. comm. praed. vrb. et rust. l. 8. D. de acq. emt. l. 20. §. 1. D. de acquir. ver. dom.  
 f) l. 1. D. de statu lib.

nisi liberali seruendi ratione libertatem vel manumissionem meruissent: ita praedia, quae seruitur, quadam personali adficiiebantur, seruiebant quidem, at spes erat, ea aliquando libera futura, quia vel ad certum tempus certamue conditionem, g) vel ad mortem tantum certae personae eiusdemue capitis deminutionem h) durabant hae seruitutes, et, quamuis ciuitati aliuue vniuersitati essent constitutae, tamen centum annorum spacio; i) et personae heredibusque eius legatae, primorum heredum morte finiebantur: k) at seruitutes praediales semper erant perpetuae, et rem seu praedium sequebantur, l) donec legitimo aliquo modo exstinguerentur. Quamobrem, constituta semel huiusmodi seruitute id non modo in praediorum venditionibus exprimebant: QVIBVS EST SERVITVS, VTIQVE SIT, ITA SIT: ITINERA, ACTVS, QVIBVS SVNT, VTIQVE SVNT, ITA SINT: LVMINA, FLVMINA, STILLICIDIA, VTI NVNC SVNT, ITA SINT: m) verum etiam, ne haec pacta vlla vmquam obliteraret obliuio, inscriptionibus et marmoribus ibi positis indicabant, praedium aliquod alteri certam seruitutem debere. Tale enim est elogium illud apud GRVTERVM: n)

PER HANC  
VIAM FVNDO  
C. MARCI CL.  
PHILERONIS  
ITER ACTVS  
DEBETVR.

Adeo sua interesse existimabant Romani, non modo perpetuas esse seruitutes praediales, verum etiam interpositarum ea de re

- g) l. 15. D. quemadm. seru. amitt. l. 5. C. de vsufr.  
h) §. 3. Inst. de vsufr. l. 1. l. 2. §. 1. l. 3. D. quemadm. seru. amitt.  
i) l. 56. D. de vsufr. l. 8. D. de vsu et vsufr. leg.  
k) l. 5. pr. D. l. 14. C. quemadm. seru. amitt.  
l) l. 12. D. comm. praed. l. 20. §. 1. D. de adqu. rer. dom.  
m) l. 17. §. 3. D. de seruit. praed. urb. l. 33. D. de contrab. emt.  
Barn. Briffon. de formul. Lib. VI. p. 554.  
n) Gruter. inscript. p. CCI.

re stipulationum perpetuam ad posteros exstare memoriam. Quis vero negauerit, seruitutem, quae perpetua debebat esse, ac ne quidem in diem, vel sub conditione, vel ad certam conditionem constituta, ipso iure valebat, o) CAVSSAM etiam PERPETVAM habere debuisse, quum effectus sine causa non intelligatur, et talis effectus, qualis causa, esse solet?

## §. XXV.

Ex quo deinde facile intelligitur, praedialium tantum <sup>Eius principii</sup> vel realium seruitutum hanc esse adfectionem, non personarum. Nam ipse PAVLLVS p) regulam istam his limitibus circumscribit: *Omnes autem seruitutes PRAEDIORVM perpetuas causas habere debent.* Exstimare equidem quis posset, eandem et seruitutum personalium esse indolem, quia etiam utendum, fruendum, habitandum sit, salua rerum substantia. q) Enimvero, vnusquisque animaduertit, eam substantiae perpetuitatem in seruitutibus personalibus non seruitutis, sed proprietatis causa, requiri. Quia enim non perpetua est seruitus personalis, sed interiecto tempore expirat: interest profecto proprietarii, saluam sibi esse rerum seruientium substantiam, eoque nomine sibi satisdatum esse: ac proinde Senatus non dubitauit etiam rerum, quae usu consumuntur, quasi usufructum permittere, quia, cautione quasi usufructuaria veluti in substantiae locum surrogata, satis prospectum videretur proprietario. r) At causa perpetua in seruitutibus praedialibus, dominantis, non seruientis praedii causa, exigitur, quia ipsas illas seruitutes perpetuas esse ac perpetuo deberi voluerunt, quippe ipso iure non aliter inter viuos adquirendas, quam mancipatione et in iure cessione, quarum neutra diem vel conditionem, ceu iam supra monuimus, admittebat. Et haec est vera ac genuina regulae istius ratio, nec subtilis admodum, et iuris analogiae conuenientissima,

F 2

quod

o) l. 4. D. de seruit.

p) l. 28. D. de seru. praed. urban.

q) l. 1. D. de usufr. pr. Inst. cod.

r) l. 2. §. 1. D. de usufr. ear. rer. quae usu consum.

quod ita ostendimus: Non alii sunt legitimi seruitutem praediallem inter viuos adquirendi modi, quam mancipatio ac in iure cessio: (§. XXIII.) vtraque vero haec est actio legis, s) quae nec diem, nec conditionem admittit, t) adeoque seruitus his modis constituta est perpetua. u) Seruitus perpetua requirit etiam causam perpetuam: (§. XXV.) ac proinde seruitus praedialis omnis requirit causam perpetuam.

## §. XXVI.

Quid sit  
CAVSSA PER-  
PETVA?

Proximum est, vt, quid demum istis CAVSSAE PERPETVAE vocibus significetur, paullo accuratius disquiramus. Et hic quidem primo omnium obseruo, eam loquendi rationem alibi quoque in iure nostro occurrere, veluti quando PAVLLVS x) ait: *Dotis CAVSSA PERPETVA est, et cum voto eius, qui dat, ita contrahitur, vt SEMPER apud maritum sit.* Itemque quando idem scribit iureconsultus: y) *Quod leges fieri prohibent, si PERPETVAM CAVSSAM seruaturum est, cessat obligatio, veluti si sororem sibi nupturam aliquis stipuletur. Quamquam etiamsi non sit CAVSSA PERPETVA, vt accidit in sorore adoptiua, idem dicendum sit, quia statim contra mores sit.* Nimirum CAVSSA, quando personis rebusque in iure nostro tribuitur, nihil fere aliud est, quam rerum illarum qualitas et conditio, ex qua vel commodam, vel incommodam aliquod, percipimus. Quod adeo verum est, vt ipse scriptor sacer, D. MATTHAËVS z) eodem sensu *αἰτίας τῇ ἀνθρώπων*, causam hominis pro eiusdem conditione dixerit, ceu post IS. CASABONVM recte obseruauit HUGO GROTIVS. a) Sic ergo hoc sensu dicuntur res transire cum sua CAVSSA, b) vindicari cum sua CAVSSA,

s) Guil. Maran. de actib. legis. p. 230.

t) l. 77. D. de reg. iur.

u) l. 4. D. de seruis.

x) l. 1. D. de iure dot.

y) l. 35. §. 1. D. de verb. oblig.

z) Matth. XVIII, 10.

a) Hugo Grot. Commentar. ad Matth. p. 326.

b) l. 67. D. de contrab. emt. l. 12. C. de distract. pign. l. vn. C. rem alien. gerens.



CAVSSA, c) *restitui non tantum corpora, sed et rei* CAVSSA: d) quemadmodum et homines *re uti solent cum sua* CAVSSA, *suisque vitiis*. e) Nec alio sensu MARTIALIS: f)

*Quid Nomentani CAVSSAM tibi perdis AGELLI,  
Propter vicinum qui pretiosus erat?*

Vbi *caussa* utique nihil aliud est, quam rei qualitas et conditio, ex qua vel commodum vel incommodum aliquod ad possessorem redit. Ergo et CAVSSA SERVITVTIS idem est, ac eius qualitas et conditio, quae efficit, ut praedii dominantis possessor eam utilitatem, cuius *caussa* constituta est, ex ea capiat. Quare tantum abest, ut regula de *caussa* servitutum perpetua ad earum obiectum, ceu SCHILTERVS g) voluit, vel ad *causam* finalem, quod M. AVR. GALVANO h) visum est, referenda sit, ut potius ipsam servitutis qualitatem, vel conditionem, ex qua utilitas aliqua seu commodum quaecumque ad praedii dominantis possessores redit, adeoque formam servitutis, manifesto denoter. Vnde et ipsae servitutes a forma sua saepenumero QUALITATES, i) CONDITIONES, k) nec non UTILITATES *praediorum* l) solent adpellari. In eo enim forma et quasi substantia consistit omnis servitutis praedialis, ut ea sit praedii servientis qualitas et conditio, quae commodum, ob quod constituta est, praedii dominantis possessoribus praestare possit. PERPETVVM porro iureconsultis non est idem ac *sempiternum*, sed diuturnum, ac tamdiu duraturum, quoad durent praedia. Sicuti enim aliquis dicitur IN PERPETVVM *relegatus*, m) id est, quoad vivit: IN PERPE-

F 3

TVVM

- e) l. 17. §. 5. D. ad SC. Trebell.
- d) l. 20. pr. D. de rei vind. l. 31. pr. D. de reb. cred.
- e) l. 23. §. 1. D. de acqu. vel amitt. possess.
- f) Martialis Lib. VII. Epigr. LXXXIII. v. 5.
- g) Schilter Exerc. XVIII. §. XIII.
- h) Galvan. de usufructu Cap. XXXVIII. p. 398.
- i) l. 12. D. quemadm. serv. amitt.
- k) l. 23. §. 2. D. de serv. praed. rust.
- l) l. 1. §. ult. D. si usufr. pet.
- m) l. 3. C. qui pet. tut.

TVVM *procurator datus*, n) id est, quoad durat administratio: morbo PERPETVO *impeditus*, o) id est, diuturno, quamvis fultim morte finiatur, immo aliquando contingat, quod alicubi ait PLINIUS, p) vt quis PERPETVAM *valetudinem feliciter euadat*: ita et perpetuam causam habere dicitur seruitus, cuius ea est qualitas et conditio, vt praedii dominantis possessores, quoad durant praedia, et quoties collibitum est, ea vti, commodumque inde percipere possint. Et ita sane perpetuitatem causae seruitutis ipse explicat PAVLLVS, q) dum scribit: *Quum in lege aedium ita scriptum esset: Paries oneri serundo, vti nunc est ita fit, satis aperte significari, IN PERPETVVM parietem esse debere. Non enim hoc bis verbis dici, vt in perpetuum idem paries AETERNVS esset, (quod ne fieri quidem posset,) sed vti EIVSDEM MODI* (id est, eiusdem conditionis) *paries in perpetuum esset, qui onus sustineret.* Accedit, quod bina illa loca supra adducta, in quibus itidem fit mentio CAUSSAE PERPETVAE, non alium, quam hunc eundem, sensum admittunt. In priore enim CAUSSA *dotis* dicitur PERPETVA, r) quia illius ea est conditio, vt constante matrimonio semper penes maritum sit, et inde ille vtilitatem capiat ad ferenda matrimonii onera. In posteriore s) PERPETVAM CAUSSAM *prohibitionis* matrimonium cum sorore seruare ait PAVLLVS, quia eius ea est conditio, vt semper prohibitio duret, contra, *non esse* PERPETVAM CAUSSAM *prohibitionis in sorore adoptiua*, quia ea, durante tantum adoptione, obtinet, ea vero per emancipationem dissoluta, vel ipso filio emancipato, nuptiae inter eas personas non prohibentur. t) Atque hic est verus ac genuinus

n) l. 3. 4. D. *procnr.*

o) l. 6. l. ult. §. 1. D. *de aedilit. Edicto.*

p) Plin. Lib. I. *Epist. XII.*

q) l. 33. D. *de seru. praed. vrb.*

r) l. 1. D. *de iure dot.*

s) l. 35. §. 1. D. *de verb. oblig.*

t) §. 2. *Inst. de nups.*

nus sensus regulae, quae causam seruitutum perpetuam esse debere statuit.

§. XXVII.

Iam porro obseruandum est, non omnes seruitutes eiusdem esse generis. Quaedam enim ita sunt comparatae, ut semper sint *praediales*, adeoque ne dubitari quidem possit, quin semper praediis debeantur, ac proinde causam habeant perpetuam, quales sunt urbanae pleraeque, et e rusticis *iter, actus, via*. Quare ad has seruitutes non pertinet illa veterum de causa perpetua disputatio. Alia praediorum iura naturae sunt tam ancipitis atque ambiguae, ut dubiterur nonnumquam, personae concessae sint, an vicino praedio. Vtrumque enim fieri posse, et vnam eandemque seruitutem, personae, nulla habita praedii ratione, concessam, personalem; praedio constitutam realem esse, ipsa iura nostra statuunt. u) Sic *aquae vsus* inter reales seruitutes est, x) et tamen personae concessus, personalis naturam induit. y) Et ius siluae caedendae, quod praedio concessum inter praediorum seruitutes foret, personalibus tamen seruitutibus adnumeratum aliquando videas. z) Sed et de pecoris pascendi similibusque seruitutibus diserte scribit PAPINIANVS: a) *Pecoris pascendi seruitus, item ad aquam adpellendi, si praedii fructus maxime in pecore consistat, praedii magis, quam personae, videtur. Si tamen testator personam demonstrauit, cui seruitutem praestari voluit, emptori vel heredi non eadem praestabitur seruitus*. Ex quo loco simul intelligimus, aliquando dubitandi rationes satis esse idoneas, praedione, an personae, concessa sit huiusmodi seruitus. Si ergo olim ex testamento vel pactionis legibus constabat, praedione, an personae, seruitus quaedam deberetur: non quaerebatur, an causa

u) l. 14. §. ult. D. de alim. et cibor. legat.

x) l. 1. D. de seru. praed. rustic.

y) l. 21. D. de usu et habitat.

z) l. 22. pr. D. eod.

a) l. 4. D. de seru. praed. rustic.

caussa seruitutis illius esset perpetua, quia, tametsi talis causa esse non videretur, nec adeo *stricto iure* consisteret seruitus, ea tamen *tuitione Praetoris* sustinebatur. b) (§. XXIII.) Sin vero quis possessione tantum sibi huiusmodi ius, tanquam seruitutem praedialem, adquisuisse videbatur: tunc vero dispiciendum erat, vtrum causa huius iuris esset perpetua, nec ne? Priore enim casu proseruitute praediali; posteriore pro personali habebatur. Atque inde patet, cur PAVLLVS c) in vexatissima illa lege scripserit: *Foramen in imo pariete conclusus vel triclunii TEMPORE non ADQVIRI, placuit. Neque enim PERPETVAM CAVSSAM habet.*

## §. XXVIII.

Regulae de  
caussa serui-  
tutum per-  
petua,

Quando porro quaerebatur, quanam seruitutes causam perpetuam habere viderentur, vel non viderentur? ex vetere philosophia respondebant iureconsulti, ea, quae ab ipsa natura, et sine manuarum opera, fiunt, siue adsidue, siue per intervalla fiant, perpetuam causam habere, non autem, quae manu fiunt: manu, inquam, non possessoris praedii dominantis, (sine qua pleraeque seruitutes exerceri plane non possent, veluti aquaeductus, ius silvae caedendae, pedamenta sumendi, arenae fodiendae, ceterae;) sed seruiantis praedii possessoris. Nam praeterquam, quod hoc manu aliquid faciente in faciendo consisteret seruitus, quod per ius civile fieri non potest, non etiam ita causa esset perpetua, quia, si quando illa seruitute uti quis vellet, ei res non foret in promptu, sed prius exorandus esset vicinus, ut aliquid, quod ad ius istius exercitum requiritur, faciat. Sic ergo non talis esset seruitutis conditio, ut a dominantis praedii possessore, quandocumque placer, exerceri posset. Hinc eleganter, et valde perspicue rem explicat NERATIVS, d) dum *aquaeductum vel aquaeductum SVFFICIENTEM esse debere,*  
ait.

- b) l. 9. §. 1. D. *vsufr. quemadmodum cau.* l. 1. D. *quib. mod. vsufr. amitt.*  
l. 4. D. *de seruit.* l. 2. D. *comm. praed.*  
c) l. 28. D. *de seru. praed. urban.* l. 20. §. 1. D. *de seru. praed. rust.*  
d) l. 2. §. ult. D. *de seru. praed. rust.*

ait. *Sufficere vero potest, quod a natura est, non quod manu hominis, toties, quoties illo opus est, perficitur. Quibus omnibus inter se comparatis, duae nobis nascuntur regulae, quibus nihil videtur esse planius, nihilevidentius. Prior: Quoties iuris, praedio cuidam inhaerentis, ea est conditio, ut solo NATVRAE beneficio et sine manuarum vicini opera, dominantis praedii possessori SUFFICIAT, ita, ut ille hoc ius quodcumque collibuerit, exercere possit: toties causa eius est perpetua, ac proinde servitutis praedialis nomen ius istud recte tuetur. Posterior: Quoties ea est iuris huiusmodi conditio, ut vel MANUARUM possessoris praedii servientis opera ad illud exercendum necessaria sit, vel saltem dominantis praedii possessori ad usum non SUFFICIAT, toties id ius causa perpetua caret, neque adeo pro servitute haberi potest. Sic ergo perpetua est causa oneris ferendi, et tigni immittendi. Quamvis enim manu fiat paries: non tamen manuarum vicini opus est opera ad servitutes illas exercendas. Paries enim ipsa natura sua ita comparatus est, ut oneri et tignis ferendis sufficiat. Sic et luminum servitus causam habet perpetuam. Paries enim, semel pertusus, natura sua sufficit, ad lumen in conclave meum transmittendum, quotiescumque eo opus est, ut nulla vicini opus sit opera manuarum. Et ita se res habet in reliquis servitutibus realibus, quarum omnium ea est conditio, ut natura rerum servientium usus vicini sufficiat, nec earum exercitium semper de nouo requirat operam vicini manuarum. Contra aquaeductus ex lacu vel stagno, quod aqua viva et perenni destituitur, causa non est perpetua, quia etsi manuarum servientis praedii possessoris opera ad eius usum non desideretur, lacus tamen ille sua natura non sufficit, ut dominans eo iure quotiescumque liber, uti possit, sed aquam illi paulatim subduci*

28. D. de  
serv. praed.  
urb.

drare, ostendamus. Inter eos vexatissimum esse PAVLLI ejus locum, nemo ignorat. Is enim tam male adhuc a plerisque intellectus est, ut non sit mirum, eum pro deposito a quibusdam haberi. Sed res in vado erit, si speciem recte formes. Iam supra observauimus, non ibi quaeri de iure aliquo legitimis modis, vel saltem iusto titulo, adquisito, quippe quod tuitione Praetoris sustineri potuisset: sed de tali, quod possessione se adquisivisse existimabat praedium dominus. FORAMEN quis adhuc habuerat in imo pariete, non vicini, quod in lege nusquam exprimitur, sed in suo procul dubio, vel, uti ipse PAVLLVS ait, IN IMO PARIETE CONCLAVIS VEL TRICLINII, quem ex libertate naturali perfodere poterat. Sed cui, quaeso, usus destinatus fuerat illud foramen? Respondet iureconsultus: QVOD ESSET PROLVENDI PAVIMENTI CAUSSA. Id vulgo ita accipiunt, ac si per illud foramen dominus aquam prolato pavimento, emisisset in vicini aream. Sed eum sensum verba PAVLLI vix admittunt. Dicendum enim fuisset: *Foramen, quod esset emittendae proluvie causa*. Vtebatur ergo triclinium dominus illo foramine non ad aquam per illud efficiendam, sed ad proluendum pavementum, adeoque aquam ad eam rem necessariam per illud recipiendam. Quod aliter fieri non poterat, quam aqua vel a vicino ingesta foramini, vel aperto epistomio ex cisterna aliqua parieti proxima, aliove aquae collectitiae receptaculo sua sponte per illud influente. Quum ergo parietis dominus sibi hoc ius possessione adquisitionem putaret, idque pro servitute fluminis non auertendi, sed recipiendi haberet: utrumque negavit PAVLLVS: posterius, quod IN EVM LOCVM NIHIL EX CAELO AQVA VENIAT: prius, quod PERPETVAM CAUSSAM NON HABEAT, QVOD MANU FIAT. Vel enim manu vicini aquam foramini immittendam esse, quotiescumque eo iure uti velit triclinii possessor, vel aquaeductus ex receptaculo aquae collectitiae non esse eam conditionem, ut aqua illa sua natura sufficiat ad iuris istius

EXCE-

e) l. 28. D. de serv. praed. urban.

exercitium, sed nouum subinde aquae supplementum feruientis manu fore ingerendum, si sufficere debeat. Si quis vero per tempus lege definitum aquam e teſto vicini per fiſtulas, qualium ſaepe fit mentio in iure noſtro, f) in triclinium vel aream ſuam per iſtud foramen duxiſſet, fore hanc ſeruitutem fluminis, eamque cauſſa perpetua non carituram: QVIA, QVOD EX CAELO CADIT, ETSI NON ADSIDVE FIT, EX NATVRALI TAMEN CAVSSA FIT, ET IDEO PERPETVO FIERI EXISTIMATVR. OMNES AVTEM SERVITVTES PRAEDIORVM PERPETVAS CAVSSAS HABERE DEBERE. Non vero rarum Romae fuit, aquam vndecumque per fiſtulas et tubulos in aedes, immo per ſingula earum conclauia et triclinia duci: ceu vel ex his PAPINII STATI g) verſibus intelligitur:

*An picturata lucentia marmora vena*

*Mirer, an EMISSAS per cunſta cubilia LYPHAS?*

quibuſcum coniungi merentur, quae illuſtrandis his adnotarunt IS. CASABONVS, h) IO. BRODAEVS i) et IO. MEVRIVS k) Reliquam huius textus PAVLLINI partem delacu, ſtagno, ſtillicidio, iam ſupra ita expoſuimus, vt hic plura addere nihil attineat. Sufficit iam, nos oſtendiſſe, hanc philoſophiam iureconſulti non eſſe iuſto ſubtiliorem, ſed regulis, paragrapho ſuperiore propoſitis, conuenientiſſimam, immo et planam et perſpicuam, niſi bono illi iureconſulto meram noctem oſſuſſent interpretes.

### §. XXX.

Nec plus difficultatis ineſt ſeruituti fumi immittendi, de cuius cauſſa perpetua dubitaſſe nonnullos animaduerto. Romani ſaepe diuiſis caenaculis ita habitabant, vt ſuperiora domus in alius dominio eſſent, ac inferiora. l). Vnde et ſae-

Nec non ad ſeruitutem fumi immittendi, et aquae hauſtus e cifterna.

pe ex publico in superiores contignationes erat aditus, ne superiorum contignationum domini per inferioris atrium ire commeare tenerentur. m) Habitator inferior tabernam caseariam conduxerat a Minturnensibus, in quam quum fumum immitteret conductor, (quia, vti ex PLINIO n) et MARTIALE o) ostendit BRISSONIVS, p) fumus ille caseorum gratiam et saporem augere credebatur,) fumus iste per caminum in superiores aedium partes adscendebat. Quaerebatur, an ius fuerit conductori fumum immittere in caenaculum superius? Respondit T. ARISTO Cerellio Vitali, q) *non putare se, ex taberna casearia fumum in superiora aedificia iure immitti posse, nisi ei rei servitutem talem admittat.* Vbi verba postrema vix sensum fundunt, nisi legeris: *etsi ea res servitutem talem admittat.* Concedit enim ARISTO, huiusmodi servitutem posse constitui, ac proinde possessori eo nomine indulget formulam actionis confessoriae: *IUS ESSE, FVMVM IMMITTERE.* At non constituta hac servitute, superioris aedificii inquilinum recte experiri posse negatoria: *IUS EI NON ESSE FVMVM IMMITTERE*, conductorem vero, si tunc vti non recte possit taberna casearia, Minturnenses actione conducti iure conuenire. Haec ARISTO. Iam obuertunt nobis, fumi causam non esse perpetuam, quia manu sit excitandus, et tamen fumi immittendi servitutem consistere. Immo respondemus, huius servitutis eam esse conditionem ac indolem, vt caminus semel recte factus dominanti sine vlla manuarum superioris habitatoris opera sufficiat, ad fumum ex taberna casearia in superius caenaculum emittendum: ac proinde eius causam manifesto esse perpetuam. Fumus manu excitatur, aut non seruientis, sed dominantis praedii possessoris.

m) Liu. *Lib. XXXV* III. *Cap. XIII.*

n) Plin. *Hist. Nat. Lib. XI. Cap. XXXXII.*

o) Martial. *Libr. XIII. Epigr. XXXII.*

p) Brissou. *Sel. antiqu. Libr. IIII. Cap. XV.*

q) l. 8. §. 5. *D. si seruit. vindic.*



ris. Id vero salua perpetua seruitutis caussa fieri posse, et in plerisque seruitutibus fieri, iam supra vidimus. Sed alia est ratio seruitutis aquae haustus ex cisterna; lacu, piscina et puteo, aquam viuam non habentibus, quam iure consistere posse negat VLPIANVS. r) Neque enim huius iuris ea est conditio, vt aqua illa natura sufficiat vsibus vicini, ac non potius mox vacua futura sint illa aquae collectitiae receptacula. Immo necessitas imponeretur seruientis praedii domino, aquam exhaustam aliunde manu ingerendi, si cisterna sufficere deberet. Verum quidem est, aquam ipsam, quia e caelo cadit, causam habere perpetuam. At iam supra monuimus, non hic obiecti rationem haberi, sed formae seruitutis. Aquae caussa hic est perpetua, non autem formae aquae haustus ex cisterna, lacu, piscina, puteo, quia natura sua hae res omnes non ita sufficiunt alterius vsibus, vt aquam semper, et quoties id exigit praedii sui necessitas, haurire possit. Ex quo simul animaduertimus cur et aquaeductus, et aquae haustus, immo et ius nauigandi recte constituatur in lacu perpetuo vel viuam aquam habente: s) quia tunc ea est seruitutum harum conditio, vt aqua illa exercendis istis iuribus semper sufficiat, nec vlla ad id necessaria sit manuaria vicini opera.

## §. XXXI.

Sed et seruitutes aquae rota e flumine tollendae, vel Denique ad e castello ducendae, iure consistere negat ANTONINVS CARACALLA, quem, dubitantibus ea de re iureconsultis, hunc in modum Tulliano rescripsisse refert VLPIANVS: t) *Licet seruitus IURE NON VALVIT, si tamen hac lege comparauit, seu alio quocumque legitimo modo sibi hoc ius adquisiuit, tuendum esse eum, qui hoc ius possedit.* Hic vero manifesto nobis aquam

seruitutem aquae rota e flumine tollendae, vele castello ducendae.

haerere existimabunt. Machina enim illa hydraulica, vel castello, semel rite confectis, (de quibus plura eaque selecta collegit CUIACIUS, u) eam huius servitutis aiunt esse naturam, ut abunde sufficiat dominantis visibus, nec ulla desideretur servientis opera. Causam ergo huius iuris esse perpetuam, et tamen ei locum inter servitutes concedere noluisse veteres. Enimvero in tota illa lege ne vestigium quidem occurrit causae perpetuae: neque adeo ex ea probari potest, ideo hanc servitutem iure non valuisse, quod causa perpetua destitueretur. Quod et recte observavit laudatus CUIACIUS, x) qui ideo aliam commentus est causam, cur illud ius iure non valuerit, puta, quia vix sit, ut praedia tanta aquae copia indigeant, ut adhiberi organa oporteat, non possint autem ipso iure constitui servitutes ultra, quam opus sit ad praedia. y) Sed quis ignorat, saepe huiusmodi machinas exigere praedium, immo et in Halae suburbio non deesse rotam, qua aqua ex Sala tollitur in usum praedii privati, in quo certa cerevisia coquitur? Itaque nodum vix soluit illa, quantumvis ingeniosa coniectura CUIACII. At res in vado est. Servitutes illae iure non valuerunt, non quod causam non haberent perpetuam: sed quod in flumine, quippe publico, et castello nemini constitui posset servitus. Hinc ipse VLPPIANUS: z) *Haec, inquit, de haustu ex fonte privato. Ad flumen autem publicum, idem Neratius eodem libro scribit, iter debere cedi, haustum non oportere. Et si quis tantum haustum cesserit, nihil eum agere.* Sed non magis ex castello ab ullo constitui poterat servitus aquaeductus. *Aquam enim inde ducere a principe conceditur, nec alii ulli competit ius aquae dandae,* inquit VLPPIANUS, a) Recte ergo iure valere

u) Cuiac. *Observ. Lib. III, Cap. XXVIII.*

x) Cuiac. *ibid.*

y) l. 5. *fin. D. de servit. praed. rust.*

z) l. 3. §. ult. *D. eod.*

a) l. 1. §. 42. *D. de aqua quotid. et aestiva.*

lere has seruitutes negauit ANTONINVS Imp. quia in flumine seruitus a priuato non magis constituitur, quam in mari. Enimuero quemadmodum is tuendus est a Praetore, qui ius aliquod in mari legitimis modis adquisiuit, et hinc denuo scribit VLPIANVS: b) *Venditor fundi Geroniani fundo Botroiano, quem retinebat, legem dederat, ne contra eum piscatio thynaria exerceatur. Quamuis MARI, quod natura omnibus patet, seruitus imponi priuata lege non potest, quia tamen bona fides contractus legem seruari venditionis exposcit: personas possidentium, aut in ius eorum succedentium per stipulationis vel venditionis legem obligantur. Ita et recte rescribere Imperator potuit, tuendum esse possessorem huiusmodi machinae iuxta flumen publicum vel aquaeductus ex castello, qui tale ius legitimo modo adquisiuerit, quamuis stricto iure neutro casu consistat seruitus, non ob causae perpetuae defectum, sed quia nulli priuato ius sit aquae haustum vel aquaeductum ex flumine publico, vel castello concedendi, iisque seruitutem priuata auctoritate imponendi.*

## §. XXXII.

Et hi quidem sunt textus illi difficiliores, qui regulae nostrae de causa seruitutum perpetua obstare visi sunt. Reliquis, quos supra aliorum sententiis obuertimus, suis locis ipsi sati fecimus. Aetas nostra in id tempus incidit, quo ne dupondii quidem Triboniano parcunt, et si quid occurrat, quod ipsi non intelligunt, (at quam multa talia occurrunt?) statim expediunt ferulas, et eum cerebrum in calcaeo habuisse, clamant. Immo, quod mireris, ne melioris quidem aevi iureconsultos, VLPIANVM, CAIVM, PAVELVM, et similes, sine nota dimittunt, tanto ferociores plerumque,

Conclusio  
dissertationis,

rum gratiam adferam brocardicum, non vnum e multis, sed inter multa vnicum, illud puta dignissimum, quod atrio templi Delphici inscribatur: CAVSSA ETIAM FATVA A DOLO EXCVSAT. Quid hoc ad Bacchum? Nescio, nisi quod credam, eam incomparabilem regulam eatenus profuturam TRIBONIANO, ne eum pro fatuò habeant fatui, dum regulam illam, quod causam seruitutis perpetuam esse oporteat, in Pandectis exstare passus est. Si enim a dolo causa etiam fatua excusat: procul dubio a fatuitate hominem multo magis excusabunt tot solidissima, quae attulimus, argumenta. Cum viris doctis rerumque harum intelligentibus facile transigam. Hi enim sunt emunctae naris, vt, quid inter CAVSSAM SERVITVTVM PERPETVAM et fatuas illico Tribonianomastigum causas intersit, facile subolfaciant.

T A N T V M.



AP11472611